

四庫全書

史部

欽定四庫全書

史部
魏書卷四十二

詳校官編修臣溫汝适

洗馬臣王坦修覆勘

覆校官中書臣孫希旦

校對官中書臣陳林

謄錄監生臣顧永涵

欽定四庫全書

魏書卷四十一

齊

魏

收

撰

列傳第二十九

源賀

源賀自署河西王禿髮傉檀之子也傉檀為乞伏熾磐所滅賀自樂都來奔賀偉容貌善風儀世祖素聞其名及見嘉其機辯賜爵西平侯加龍驤將軍謂賀曰卿與

朕源同因事分姓今可為源氏從擊叛胡白龍又討吐
京胡皆先登陷陳進號平西將軍世祖征涼州以賀為
鄉導詔問攻戰之計賀對曰姑臧城外有四部鮮卑各
為之援然皆是臣祖父舊民臣願軍前宣國威信示其
福禍必相率歸降外援既服然後攻其孤城拔之如反
掌耳世祖曰善於是遣賀率精騎歷諸部招慰下三萬
餘落獲雜畜十餘萬頭及圍姑臧由是無外慮故得專
力攻之涼州平遷征西將軍進號西平公又從征蠕蠕

擊五城吐京胡討蓋吳諸賊皆有功拜散騎常侍從駕
臨江為前鋒大將賀為人雄果每遇彊寇輒自奮擊世
祖戒之曰兵凶戰危不宜輕犯卿可運籌處分勿恃身
力也賀本名破羌是役也世祖曰人之立名宜其得實
何可濫也賜名賀焉拜殿中尚書南安王余為宗愛所
殺也賀部勒禁兵靜遏外內與南部尚書陸麗決議定
策翼戴高宗令麗與劉尼馳詣苑中奉迎高宗賀守禁
中為之內應俄而麗抱高宗單騎而至賀乃開門高宗

卽位社稷大安賀有力焉轉征北將軍加給事中以定
策之勲進爵西平王高宗卽位班賜百僚謂賀曰朕大
賡善人卿其任意取之勿謙退也賀辭固使取之賀唯
取戎馬一疋而已是時斷獄多濫賀上書曰案律謀反
之家其子孫雖養他族追還就戮所以絕罪人之類彰
大逆之辜其為劫賊應誅者兄弟子姪在遠道隔關津
皆不坐竊惟先朝制律之意以不同謀非絕類之罪故
特垂不死之詔若年十三已下家人首惡計謀所不及

愚以為可原其命沒入縣官高宗納之出為征南將軍
冀州刺史改封隴西王賀上書曰臣聞人之所寶莫寶
於生全德之厚者莫厚於宥死然犯死之罪難以盡恕
權其輕重有可矜恤今勅寇遊魂於北狡賊負險於南
其在疆場猶須防戍臣愚以為自非大逆赤手殺人之
罪其坐贓及盜與過誤之愆應入死者皆可原命謫守
邊境是則已斷之體更受全生之恩徭役之家漸蒙休
息之惠刑措之化庶幾在茲虞書曰流宥五刑此其義

也臣受恩深重無以仰荅將違闕庭豫增係戀敢上瞽言唯加裁察高宗納之已後入死者皆恕死徙邊久之高宗謂羣臣曰源賀勸朕宥諸死刑徙充北番諸戍自爾至今一歲所活殊為不少生濟之理既多邊戍之兵有益卿等事朕致何善意也苟人人如賀朕治天下復何憂哉顧憶誠言利實廣矣羣臣咸曰非忠臣不能進此計非聖明不能納此言賀之臨州鞠獄以情徭役簡省武邑郡姦人石華告沙門道可與賀謀反有司以聞

高宗謂羣臣曰賀誠心事國朕為卿等保之無此明矣
乃精加訊檢華果引誣於是遣使者詔賀曰卿以忠誠
歟至著自先朝以丹青之潔而受蒼蠅之汙朕登時研
檢已加極法故遣宣意其善綏所莅勿以囂謗之言致
損慮也賀上書謝書奏高宗顧謂左右曰以賀之忠誠
尚致其誣不若是者可無慎乎時考殿最賀治為第一
賜衣馬器物班宣天下賀上表請代朝議以賀得民情
不許在州七年乃徵拜太尉蠕蠕寇邊賀從駕追討破

之顯祖將傳位于京兆王子推時賀都督諸軍屯漠南
乃馳傳徵賀賀既至乃命公卿議之賀正色固執不可
卽詔賀持節奉皇帝璽綬以授高祖是歲河西勅勒叛
遣賀率衆討之降二千餘落倍道兼行追賊黨都朱于
等至枹罕大破之斬首五千餘級虜男女萬餘口雜畜
三萬餘頭復追統萬高平上邽三鎮叛勅勒至于金城
斬首三千級賀依古今兵法及先儒耆舊之說略採至
要為十二陳圖以上之顯祖覽而嘉焉賀以年老辭位

詔不許又詔都督三道諸軍屯于漠南是時每歲秋冬遣軍三道竝出以備北寇至春中乃班師賀以勞役京都又非禦邊長計乃上言請募諸州鎮有武健者三萬人復其徭賦厚加賑恤分為三部二鎮之間築城城置萬人給彊弩十二床武衛三百乘弩一床給牛六頭武衛一乘給牛二頭多造馬槍及諸器械使武略大將二人以鎮撫之冬則講武春則種植竝戍竝耕則兵未勞而有盈畜矣又於白道南三處立倉運近州鎮租粟以

充之足食足兵以備不虞於宜為便不可歲常舉衆連
動京師令朝廷恒有北顧之慮也事寢不報又上書稱
病篤乞骸骨至于再三乃許之朝有大議皆就詢訪又
給衣藥珍羞太和元年二月療疾於溫湯高祖文明太
后遣使者屢問消息太醫視疾患篤還京師賀乃遺令
勅諸子曰吾頃以老患辭事不悟天慈降恩爵逮於汝
汝其毋傲吝毋荒怠毋奢越毋嫉妬疑思問言思審行
思恭服思度遏惡揚善親賢遠佞目觀必真耳屬必正

誠勤以事君清約以行已吾終之後所葬時服單纈足
申孝心芻靈明器一無用也三年秋薨年七十三贈侍
中太尉隴西王印綬謚曰宣賻雜綵五百疋賜輜輶車
及命服溫明祕器陪葬于金陵

長子延性謹厚好學初以功臣子拜侍御中散賜爵武
城子西治都將卒贈涼州刺史廣武侯謚曰簡

子鱗襲

延弟思禮後賜名懷謙恭寬雅有大度高宗末為侍御

中散父賀辭老詔懷受父爵拜征南將軍尋為持節督諸軍屯於漢南還除殿中尚書出為長安鎮將雍州刺史清儉有惠政善於撫恤劫盜息止流民皆相率來還歲餘復拜殿中尚書加侍中參都曹事又督諸軍征蠕蠕六道大將咸受節度遷尚書令參議律令後例降為公除司州刺史從駕南征加衛大將軍領中軍事以母憂去職賜帛三百疋穀千石十九年除征北大將軍夏州刺史轉都督雍岐東秦諸軍事征西大將軍雍州刺

史景明二年徵為尚書左僕射加特進時有詔以奸吏
犯罪每多逃遁因青乃出竝皆釋然自今已後犯罪不
問輕重而藏竄者悉遠流若永避不出兄弟代徙懷乃
奏曰謹按條制逃吏不在赦限竊惟聖朝之恩事異前
宥諸流徙在路尚蒙旋反況有未發而仍遣邊戍按守
宰犯罪逃走者衆祿潤既優尚有茲失及蒙恩宥卒然
得還今獨苦此等恐非均一之法如臣管執謂宜免之
書奏門下以成式既班駁奏不許懷重奏曰臣以為法

貴經通治尚簡要刑憲之設所以網羅罪人苟理之所
備不在繁典行之可通豈容峻制此乃古今之達政救
世之恒規伏尋條制勳品已下罪發逃亡遇恩不宥仍
流妻子雖欲抑絕奸途匪為通式謹按事條侵官敗法
專據流外豈九品已上人皆貞白也其諸州守宰職任
清流至有貪濁事發逃竄而遇恩免罪勳品已下獨乖
斯例如此則寬縱上流法切下吏育物有差惠罰不等
又謀逆滔天輕恩尚免吏犯微罪獨不蒙赦使大宥之

經不通開生之路致壅進違古典退乖今律輒率愚見
以為宜停書奏世宗納之其年除車騎大將軍涼州大
中正懷奏曰南賊遊魂江揚職為亂逆肆厥滛昏月滋
日甚貴臣重將靡有子遺崇信姦回眈比閭閻內外離
心骨肉猜叛蕭寶融僭號於荆郢其雍州刺史蕭衍勒
兵而東襲上流之衆已逼其郊廣陵京口各持兵而懷
兩望鍾離淮陰竝鼎峙而觀得失秣陵孤危制不出門
君子小人竝罹災禍延首北望朝不及夕斯實天啓之

期吞并之會乘厥蕭牆之釁籍其分崩之隙東據歷陽
兼指瓜步緣江鎮戍達於荆郢然後奮雷電之威布山
河之信則江西之地不刃自來吳會之鄉指期可舉昔
士治有言皓若暴死更立賢主文武之官各得其任則
勅敵也若蕭衍克就上下同心非直後圖之難實亦揚
境危逼何則壽春之去建鄴七百而已山川水陸彼所
諳利脫江湘無波君臣效職藉水憑舟倏忽而至壽春
容不自保江南將若之何今寶卷邑居有土崩之形邊

城無繼援之兆清蕩江區寔在今日臣受恩旣重不敢
不言詔曰不君不臣江南常弊有粟不食其在斯矣上
天將欲亡之諸蕃又願取之人事天道孰云匪會但以
養害仁者不為且十月五日衍軍已達大航其大傷小
亡之勢久應有決假令天罰寶卷衍兵獲進則衍之主
佐又是亂亡遺孽皇靈其能久祐之乎今之所矜者正
以南黔企德邊書繼至殄悴之氓理須救接若爾者揚
州兵力配積不少但可速遣任城委以處分別加慰勉

令妙盡邊算也以行事克遂停懷又表曰昔世祖昇遐
南安在位出拜東廟為賊臣宗愛所弑時高宗避難龍
潛苑中宗愛異圖神位未定臣亡父先臣賀與長孫渴
侯陸麗等表迎高宗纂徽寶命麗以扶負聖躬親所見
識蒙授撫軍大將軍司徒公平原王興安二年追論定
策之勲追先臣爵西平王皇興季年顯祖將傳大位於
京兆王先臣時都督諸將屯於武川被徵詣京特見顧
問先臣固執不可顯祖久乃許之遂命先臣持節授皇

帝璽綬於高祖至太和十六年麗息叡狀私書稱其亡父與先臣援立高宗朝廷追錄封叡鉅鹿郡開國公臣時丁艱草土不容及例至二十年除臣雍州刺史臨發奉辭面奏先帝申先臣舊勲時勅旨但赴所臨尋當別判至二十一年車駕幸雍臣復陳聞時蒙勅旨征還當授自宮車晏駕遂爾不白竊惟先臣遠則援立高宗寶歷不墜近則陳力顯祖神器有歸如斯之勲超世之事麗以父功而獲河山之賞臣有家勲不霑茅社之賜得

否相懸請垂裁處詔曰宿老元臣云如所訴訪之史官
頗亦言此可依比授馮翊郡開國公邑九百戶又詔為
使持節加侍中行臺巡行北邊六鎮恒燕朔三州賑給
貧乏兼採風俗考論殿最事之得失皆先決後聞自京
師遷洛邊朔遙遠加連年旱儉百姓困敝懷銜命巡撫
存恤有方便宜運轉有無通濟時后父于勁勢傾朝野
勁兄于祚與懷宿昔通婚時為沃野鎮將頗有受納懷
將入鎮祚郊迎道左懷不與語即劾祚免官懷朔鎮將

元尼須與懷少舊亦貪穢狼籍置酒請懷謂懷曰命之
長短由卿之口豈可不相寬貸懷曰今日之集乃是源
懷與故人飲酒之坐非鞫獄之所也明日公庭始為使
人檢鎮將罪狀之處尼須揮淚而已無以對之懷旣而
表劾尼須其奉公不撓皆此類也懷又表曰景明以來
北蕃連年災旱高原陸野不任營殖唯有水田少可蓄
畝然主將參僚專擅腴美瘠土荒疇給百姓因此困敝
日月滋甚諸鎮水田請依地令分給細民先貧後富若

分付不平令一人怨訟者鎮將已下連署之官各奪一時之祿四人已上奪祿一周北鎮邊蕃事異諸夏徃日置官全不差別沃野一鎮自將已下八百餘人黎庶怨嗟僉曰煩猥邊隅事勢實少畿服請主帥吏佐五分減二詔曰省表具恤民之懷已勅有司一依所上下為永準如斯之比不便於民損化害政者具備列以聞時細民為豪彊陵壓積年枉滯一朝見申者日有百數所上事宜便於北邊者凡四十餘條皆見嘉納正始元年九

月有告蠕蠕率十二萬騎六道竝進欲直趨沃野懷朔
南寇恒代詔懷以本官加使持節侍中出據北蕃指授
規略隨須徵發諸所處分皆以便宜從事又詔懷子直
寢徽隨懷北行詔賜馬一匹細鎧一具御稍一枚懷拜
受訖乃於其庭跨鞍執稍躍馬大呼顧謂賓客曰氣力
雖衰尚得如此蠕蠕雖畏壯輕老我亦未便可欺今奉
廟勝之規總驍捍之衆足以擒其酋帥獻俘闕下耳時
年六十一懷至雲中蠕蠕亡遁懷旋至恒代案視諸鎮

左右要害之地可以築城置戍之處皆量其高下揣其厚薄及儲糧積伏之宜犬牙相救之勢凡表五十八條表曰蠕蠕不羈自古而爾遊魂鳥集水草為家中國患者皆斯類耳歷代驅逐莫之能制雖北拓榆中遠臨瀚海而智臣勇將力算俱竭胡人頗遁中國以疲于時賢哲思造化之至理推生民之習業量夫中夏粒食邑居之民蠶衣儒步之士荒表茹毛飲血之類鳥宿禽居之徒親校短長因宜防制知城郭之固暫勞永逸自皇魏

統極都於平城威震天下德籠宇宙今定鼎成周去北
遙遠代表諸蕃北固高車外叛尋遭旱儉戎馬甲兵十
分闕八去歲復鎮陰山庶事蕩盡遣尚書郎中韓貞宋
世量等檢行要險防遏形便謂準舊鎮東西相望令形
勢相接築城置戍分兵要害觀農積粟警急之日隨便
翦討如此則威形增廣兵勢亦盛且北方沙漠夏乏水
草時有小泉不濟大衆脫有非意要待秋冬因雲而動
若至冬日冰沙凝厲遊騎之寇終不敢攻城亦不敢越

城南出如此北方無憂矣世宗從之今北鎮諸戍東西
九城是也遷驃騎大將軍時武興氏王楊紹先叔集起
反叛詔懷使持節侍中都督平氏諸軍事以討之須有
興廢任從權計其邢巒李煥竝稟節度三年六月卒年
六十三詔給東園祕器朝服一具衣一襲錢二十萬布
七百疋蠟三百斤贈司徒冀州刺史兼吏部尚書盧昶
奏太常寺議謚曰懷體尚寬柔器操平正依謚法柔直
考終曰靖宜謚靖公司徒府議懷作牧陝西民餘惠化

入總端貳朝列歸仁依謚法布德執義曰穆宜謚穆公
二謚不同詔曰府寺所執並不克允愛民好與曰惠可
謚惠公懷性寬容簡約不好煩碎恒語人曰為貴人理
世務當舉綱維何必須太子細也譬如為屋但外望高
顯楹棟平正基壁完牢風雨不入足矣斧斤不平斲削
不密非屋之病也又性不飲酒而喜以飲人好接賓友
雅善音律雖在白首至宴居之暇常自操絲竹懷有七
子

長子規字靈度中書學生羽林監襲爵年三十三卒

子肅襲卒

子紹襲景明初詔復王爵尋除隴西郡開國公卒於光祿大夫贈度支尚書冀州刺史謚曰文

子文遠襲齊受禪例降

規弟榮字靈竝年三十二卒於司徒掾贈光州刺史

榮弟徽字靈祚年二十八卒於直閤將軍特贈洛州刺

史謚曰質

徽弟元諒出後懷弟真卒贈代郡太守

元諒弟子雍字靈和少好文雅篤志於學推誠待士士多歸之自祕書郎除太子舍人涼州中正肅宗踐阼以宮臣例轉奉車都尉遷司徒屬轉太中大夫司徒司馬除恒農太守遷夏州刺史時沃野鎮人破落汗拔陵首為反亂所在蜂起統萬逆胡與相應接子雍嬰城自守城中糧盡煮馬皮而食之子雍善綏撫得士心人人戮力無有離貳以饑饉轉切欲自出求糧留子延伯據守

寮屬僉云今天下分析寇賊萬重四方音信莫不斷絕
俄頃之間變在不意何宜父子如此分張未若棄城俱
去更展規略子雍泣而謂衆曰吾世荷國恩早受藩寄
此是吾死地更欲何求然守禦以來歲月不淺所患乏
糧不得制勝吾今向東州得數月之食還與諸人保全
必矣遂自率羸弱向東夏運糧延伯與將士送出城外
哭而拜辭三軍莫不嗚咽子雍行數日為朔方胡帥曹
阿各拔所邀力屈見執子雍乃密遣人齎書間行與城

中文武云大軍在近努力圍守必令諸人福流苗裔又
勅延伯令共固守子雍雖被囚執雅為胡人所敬常以
民禮事之子雍為陳安危禍福之理勸阿各拔令降阿
各拔將從之未果而死拔弟桑生代總部衆竟隨子雍
降時北海王顥為大行臺子雍具陳賊可滅之狀顥給
子雍兵馬令其先行時東夏合境反叛所在屯結子雍
轉鬪而前九旬之中凡數十戰仍平東夏徵稅租粟運
於統萬於是二夏漸寧及蕭寶夤等為賊所敗賊帥宿

勤明達遣息阿非率衆邀路華州白水被圍逼關右驛
擾咫尺不通時子雍新平黑城遂率士馬并夏州募義
之民攜家席卷鼓行南出賊帥康維摩擁率羌胡守鋸
谷斷甑棠橋子雍與交戰大破之生禽維摩又攻賊帥
契官斤於楊氏堡破之子雍出自西夏漸至於東轉戰
千里至是朝廷始得其委問除散騎常侍持節假撫
軍將軍都督兼行臺尚書復破賊帥紇單步胡提於曲
沃堡肅宗璽書勞勉之子雍在白水郡復破阿非軍多

所斬獲詔遣侍中尚書令城陽王徽於潼關宣旨慰勞
除中軍將軍金紫光祿大夫給事黃門侍郎封樂平縣
開國公邑一千戶還洛以葛榮久逼信都詔假子雍征
北將軍為北討都督時相州刺史安樂王鑒據鄴反勅
子雍與都督李神軌先討之子雍行達湯陰鑒遣弟斌
之夜襲子雍軍不克奔敗而返子雍乘機繼進徑圍鄴
城與裴衍神軌等攻鑒平之改封陽平縣開國公增邑
千五百戶進號鎮東將軍遂與裴衍發鄴以討葛榮而

信都城陷除子雍冀州刺史餘官如故子雍以冀州不
守上書曰賊中甚飢專仰野掠今朝廷足食兵卒飽暖
高壁深壘勿與爭鋒彼求戰則不得野掠無所獲不盈
數旬可坐制凶醜時裴衍復表求行詔子雍與衍速進
子雍重表固請如謂不可乞令裴衍獨行若不賜解求
停裴衍苟逼固行取敗旦夕詔不聽遂與衍俱進至陽
平郡東北漳曲榮率賊十萬來逼官軍子雍戰敗被害
年四十朝野痛惜之贈車騎大將軍儀同三司雍州刺

史公如故永安中重贈司空謚曰莊穆

長子延伯出後從伯

次子士則早亡

士則弟士正士規竝坐事死

次楷字士質小字那延襲武定中齊文襄王府參軍齊受禪例降

延伯初為司空參軍事時南秦民吳富反叛詔以河間王琛為都督延伯叔父子恭為軍司延伯為統軍隨子

恭西討戰必先鋒子恭見其年幼常訶制之而不能禁
子雍在夏州表乞兵援詔延伯率羽林一千人赴之城
關野戰勇冠三軍子雍之向東夏留延伯城守付以後
事延伯與兵士共分湯菜防固城隍及子雍為胡所執
合城憂懼延伯乃人人曉喻曰吾父吉凶不測方寸焦
爛實難裁割但奉命守城所為處重若以私害公誠孝
竝闕諸君幸得此心無虧所寄於是衆感其義莫不勵
憤朝廷聞而嘉之除龍驤將軍行夏州事封五城縣開

國子食邑三百戶卒能固守及後刺史至延伯率領義
衆還赴子雍共平黑城在甌棠橋戰先鋒陷陳身擒維
摩及至白水首摧阿非隨子雍至都進爵浮陽伯增封
百戶為諫議大夫假冠軍將軍別將隨子雍北討與葛
榮戰歿時年二十四贈持節平北將軍涼州刺史開國
如故

子孝孫襲齊受禪爵例降

子雍弟子恭字靈順聰慧好學初辟司空參軍事司徒

祭酒尚書北主客郎中攝南主客事蕭衍亡人許周自稱為衍給事黃門侍郎朝士翕然咸共信待子恭奏曰徐州表投化人許圓并其弟周等究其牒狀周列云已蕭衍黃門侍郎又稱心存山水不好榮宦屢曾辭讓貽彼赫怒遂被出為齊康郡因爾歸國願畢志嵩嶺比加採訪略無證明尋其表狀又復莫落案牒推理實有所疑何者昔夷齊獨往周王不屈其志伯汎辭祿漢帝因成其美斯實古先詰王必有不臣之人者也蕭衍雖復

崎嶇江左竊號一隅至於處物未甚悖禮豈有士辭榮
祿而苟不聽之哉推察情理此則孟浪假蕭衍皆狂不
存雅道逼士出郡未為死急何宜輕去生養之土長辭
父母之邦乎若言不好榮官志願嵩嶺者初屆之日卽
應杖策尋山負帙泔水而乃廣尋知己遍造執事希榮
之心已見逃宦之志安在昔梁鴻去鄉終傭吳會逢萌
浮海遠客遼東竝全志養性逍遙而已考之事實何具
懸哉又其履歷清華名位高達計其家累應在不輕今

者歸化何其孤迴設使當時忽遽不得攜將及其來後家貲產業應見簿斂尊卑口累亦當從法而周兄弟怡然嘗無憂感若無種族理或可通如有不坐便應是衍故遣非周投化推究二三真偽難辨請下徐揚二州密訪必令獲實不盈數旬玉石可覩於是詔推訪周果以罪歸闕假稱職位如子恭所疑河州羌却鐵忽反殺害長吏詔子恭持節為行臺率諸將討之子恭嚴勒州郡及諸軍不得犯民一物輕與賊戰然後示以威恩兩旬

間悉皆降歟朝廷嘉之正光元年為行臺左丞巡行北
邊轉為起部郎明堂辟雍並未建就子恭上書曰臣聞
辟臺望氣軌物之德既高方堂布政範世之道斯遠是
以書契之重理冠於造化推尊之美事絕於生民至如
郊天饗帝蓋以對越上靈宗祀配天是用酬膺下土大
孝莫之能加嚴父以茲為大乃皇王之休業有國之盛
典竊惟皇魏居震統極總宙馭宇草創土中垂式無外
自北徂南同卜維於洛食定鼎遷民均氣候於寒暑高

祖所以始基世宗於是恢構按功成作樂治定制禮乃訪遺文修廢典建明堂立學校興一代之茂矩標千載之英規永平之中始創雉構基趾草昧迄無成功故尚書令任城王臣澄按故司空臣沖所造明堂樣并連表詔荅兩京模式奏求營起緣期發旨卽加葺繕侍中領軍臣乂物動作官宣贊授令自茲厥後方配兵人或給一千或與數百進退節縮曾無定準欲望速了理在難克若使專役此功長得營造委成責辦容有就期但所

給之夫本自寡少諸處競借動即千計雖有繕作之名
終無就功之實爽塏荒茫淹積年載結架崇構指就無
兆仍令肆冑之禮掩仰而不進養老之儀寂寥而不返
構厦止於尺土為山頓於一簣良可惜歟愚謂召民經
始必有子來之歌興造勿亟將致不日之美況本兵不
多兼之牽役廢此與彼循環無極便是輟創禮之重資
不急之費廢經國之功供寺館之役求之遠圖不亦闕
矣今諸寺大作稍以粗舉竝可徹減專事經綜嚴勒工

匠務令克成使祖宗有薦配之期蒼生覩禮樂之富書
奏從之除冠軍將軍中散大夫又領治書侍御史秦益
氏反詔子恭持節為都督河間王琛軍司以討之事平
仍行南秦州事及六鎮反以子恭兼給事黃門即持節
慰勞還拜河內太守加後將軍平絳蜀反丹谷清廉二
路險澁不通以子恭為當闕字郡別將俄而建興蜀復反
相與連勢進子恭為持節散騎常侍假平北將軍征建
興都督仍兼尚書行臺與正平都督長孫稚合勢進討

大破之正平賊帥范明遠與賊帥劉牙奴竝面縛請降
事平除平南將軍豫州刺史尋加散騎常侍撫軍將軍
武泰初郢州刺史元願達以城降蕭衍詔徵都督尉慶
賓還京師回衆隸子恭以討之衍將夏侯夔率衆數萬
來寇遠近不安夔乘勢分兵遂逼新蔡自攻毛城子恭
隨方應援賊竝破走蕭衍豫州刺史夏侯亶復遣四將
率衆三萬入圍南頓北攻陳項子恭遣軍禦之賊復奔
退加鎮南將軍又兼尚書行臺子恭勒衆渡淮徙民於

淮北立郡縣置戍而還蕭衍直閣將軍軍主胡智達等
八將與其監軍閻次洪入寇屯於州城東北四十餘里
子恭擊破之斬智達生擒次洪元顥之入洛也加子恭
車騎將軍子恭不敢拒之而頻遣間使參莊帝動靜未
幾顥敗車駕還洛進征南將軍兼右僕射假車騎將軍
後加散騎常侍板橋蠻文石活石忌龐受蕭衍印節扇
誘黨類據險寇竊子恭躬率將士徑襲其柵數日之中
殲殪略盡諸蠻歛服咸求輸稅徵拜右光祿大夫給事

黃門侍郎仍奉將軍錄其前後征討功封臨潁縣開國侯食邑六百戶加散騎常侍俄遷侍中余朱榮之死也世隆度律據斷河橋詔子恭為都督以討之出頓於大夏門北尋而太府卿李苗夜燒河橋世隆退走仍以子恭兼尚書僕射為大行臺大都督尋遷衛將軍假車騎將軍率諸將於太行築壘以防之既而余朱兆率衆南出子恭所部都督史忤龍羊文義開柵降兆子恭退走為兆所破衆既退散兆因入洛子恭竄于緱氏仍被執

送俄而見釋前廢帝初除驃騎將軍左光祿大夫侍中如故尋授散騎侍郎都督三州諸軍事本將軍假車騎大將軍行臺僕射荊州刺史以與定策之勳封臨汝縣開國子食邑三百戶時叛蠻雷亂清受蕭衍兗州刺史章綬入為寇掠諸蠻從之置立郡縣子恭討平之永熙中入為吏部尚書加驃騎大將軍以子恭前在豫州戰功追賞襄城縣開國男食邑二百戶又論子恭餘効封新城縣開國子食邑四百戶子恭尋表請轉授第五子

文盛許之天平初除中書監三年拜魏尸又為齊獻武
王軍司元象元年興和二年贈都督徐兗二州諸軍事
驃騎大將軍尚書左僕射司空公兗州刺史謚曰文獻
子彪字文宗子恭存日轉授臨潁縣開國侯武定末太
子洗馬

彪弟文瑤武定中襲襄城縣開國男齊受禪爵竝降

子恭弟纂字靈秀員外散騎侍郎累遷征虜將軍通直
散騎常侍涼州大中正轉大府少卿建義初遇害河陰

年三十七贈散騎常侍征北將軍定州刺史

懷弟貞字思周少而謹密初為中書學生隨父討勅勒
有斬獲之功遷中散前後使檢察州鎮十餘所皆有功
績除長樂太守以母老解官歸養卒無子

史臣曰源賀堂堂非徒武節而已其翼戴高宗庭抑禪
讓殆社稷之臣也懷幹略兼舉出內有聲繼迹賢考不
墜先業子雍効立夏方身亡冀野惜乎

魏書卷四十一

魏書卷四十一考證

源賀傳時年二十四○二監本誤三

臣人龍

按本傳云

子雍戰敗被害年四十今延伯隨父北討與葛榮戰
同時戰歿安有父年四十而子已三十四耶今依別
本改

掩仰而不進○仰字疑抑字之訛

元象元年興和二年贈都督徐兗二州諸軍事○

臣人

龍

按孝靜帝紀卽位之五年改元元象其明年又改

元興和元象元年句下當脫一卒字蓋子恭卒於元
象元年至興和二年乃卹贈也

魏書卷四十一考證

欽定四庫全書

魏書卷四十二

齊

魏

收

撰

列傳第三十

薛辯

寇讚

酈範

韓秀

堯暄

薛辯字允白其先自蜀徙於河東之汾陰因家焉祖陶
與薛祖薛落等分統部衆故世號三薛父彊復代領部
落而祖落子孫微劣彊遂總攝三營善綏撫為民所歸

歷石虎苻堅常憑河自固仕姚興為鎮東將軍入為尚書彊卒韞復襲統其營為興尚書郎建威將軍河北太守韞稍憍傲頗失民心劉裕平姚泓韞舉營降裕司馬德宗拜為寧朔將軍平陽太守及裕失長安韞來歸國仍立功於河際太宗授平西將軍雍州刺史賜爵汾陰侯泰常七年卒於位年四十四

子謹字法順容貌魁偉頗覽史傳劉裕擒泓辟相府行參軍隨裕渡江尋轉記室參軍韞將歸國密使報謹遂

自彭城來奔朝廷嘉之授河東太守後襲爵平西將軍
汾陰侯謹所治與屈丐連接結士抗敵甚有威惠始光
中世宗詔奚斤討赫連昌勅謹領偏師前鋒鄉導旣剋
蒲坂世祖以新舊之民并為一郡謹仍為太守遷秦州
刺史將軍如故山胡白龍憑險作逆世祖詔鎮南將軍
奚眷與謹自太平北入討平之除安西將軍涪陵公刺
史如故太延初征吐沒骨平之謹自郡遷州威惠兼備
風化大行時兵荒之後儒雅道息謹命立庠教以詩書

三農之暇悉令受業躬巡邑里親加考試於是河汾之地儒道興焉真君元年徵還京師除內都坐大官五年為都將從駕北討以後期與中山王辰等斬於都南時年四十四尋贈鎮西將軍秦雍二州刺史謚曰元公

長子初古拔一曰車輅拔本名洪祚世祖賜名沉毅有器識年始弱冠司徒崔浩見而奇之真君中蓋吳擾動關右薛永宗屯據河側世祖親討之乃詔拔糾合宗鄉壁於河陰斷二寇往來之路事平除中散賜爵永康侯

世祖南討以拔為都將從駕臨江而還又共陸真討反
氏仇儻檀彊免生平之皇興三年除散騎常侍尚西河
長公主拜駙馬都尉其年拔族叔劉彧徐州刺史安都
據城歸順勅拔詣彭城勞迎除冠軍將軍南豫州刺史
延興二年除鎮西大將軍開府進爵平陽公三年拔與
南兖州刺史游明根南平太守許舍等以治民著稱徵
詣京師顯祖親自勞勉復令還州太和六年改爵為河
東公八年三月詔拔入朝暴病卒年五十八贈左光祿

大夫謚曰康

長子允字寧宗少有父風弱冠拜中散襲爵鎮西大將軍河東公除懸瓠鎮將蕭蹟遣將寇邊詔盾為都將與穆亮等拒於淮上尋授持節義陽道都將十四年文明太后公除高祖詔諸刺史鎮將曾經近侍者皆聽赴闕允隨例入朝屬開草五等降公為侯十七年高祖南討詔趙郡王幹司空穆亮為西道都將時幹年少未涉軍旅高祖乃除允假節假平南將軍為幹副軍行達褒父

以蕭蹟死班師又為都將共討秦州反賊支酉疑生擒

斬之除立忠將軍河北太守郡帶山河路多盜賊有韓
馬兩姓各二千餘家恃彊憑險最為狡害劫掠道路侵
暴鄉閭允至郡之日卽收其奸魁二十餘人一時戮之
於是羣盜懾氣郡中清肅二十三年秋遇疾卒於郡時
年四十四謚曰敬

子裔字豫孫襲爵性豪爽盛營園宅賓客聲伎以恣嬉
遊歷尚書左外兵郎左軍將軍遷征虜將軍中散大夫

出為洛州刺史卒贈平西將軍岐州刺史

子孝紳襲爵稍遷前將軍太中大夫孝紳立行險薄坐事為河南尹元世儒所劾死後贈征西將軍華州刺史

允弟字崇業廣平王懷

闕一

中令汝陰太守

子修仁司空行參軍

修仁弟元景陳留太守

拔弟洪隆字菩提解褐陽平王國常侍稍遷河東太守

長子驎駒好讀書舉秀才除中書博士太和九年蕭隋

使至乃詔驎駒兼主客郎以接之十年秋遇疾卒時年三十五贈寧朔將軍河東太守謚曰宣

長子慶之字慶集頗以學業聞解褐奉朝請領侍御史遷廷尉丞廷尉寺隣接北城曾夏日於寺傍執得一狐慶之與廷尉正博陵崔纂或以城狐狡害宜速殺之或以長育之月宜待秋分二卿裴延儁袁翻互有同異雖曰戲謔詞義可觀事傳於世轉尚書郎兼尚書左丞為并肆行臺賜爵龍丘子行并州事遷征虜將軍滄州刺

史為葛榮攻圍城陷尋患卒後贈右將軍華州刺史

慶之弟英集性通率隨舅李崇在揚州積年以軍功歷
司徒鎧曹參軍稍遷治書侍御史通直散騎常侍卒

麟駒弟鳳子自徙都洛邑鳳子兄弟移屬華州河西郡
馬太和二年為太子詹事丞本州中正世宗登阼轉太
尉府鎧曹參軍稍遷治書侍御史正始初為持節征義
陽軍司還京其年秋卒時年四十九贈陵江將軍光城
太守

鳳子弟驥奴州主簿

洪隆弟破胡州治中別駕稍遷河東太守征仇池都將
有六子

長子聰字延智有世譽累遷治書侍御史直閣將軍為
高祖所知世宗踐阼除輔國將軍齊州刺史卒於州贈
征虜將軍華州刺史

長子景茂司州記室從事猗氏令早卒

景茂弟孝通頗有文學永安中中尉高道穆引為御史

歷中書舍人中書侍郎常山太守遇惡疾而卒

聰弟道智尚書郎卒

子長瑜天平中為征東將軍洛州刺史擊賊潼關沒於

陳贈都督冀定太三州諸軍事車騎將軍冀州刺史

道智弟仙智郡功曹

仙智弟曇賢卒於國子博士

小子景淵尚書左民郎

曇賢弟和字導穆解褐大將軍劉昶府行參軍轉司空

長流參軍除太尉府主簿遷諫議大夫永平四年正月
山賊劉龍駒擾亂夏州詔和發汾華東秦夏四州之衆
討龍駒平之和因表立東夏州世宗從之又行正平潁
川二郡事除通直散騎常侍蕭衍遣將張齊寇晉壽詔
和兼尚書左丞為西道行臺節度都督傅豎眼諸軍大
破齊軍正光初除左將軍南青州刺史卒於州年五十
五贈安北將軍瀛州刺史

長子元信武定末中軍將軍儀同開府長史

和弟季令奉朝請

破胡弟破氏為本州別駕早卒四子

長子敬賢為鉅鹿太守

破氏弟積善為中書博士臨淮王提友

子隆宗太原太守

寇讚字奉國上谷人因難徙馮翊萬年父脩之字延期
符堅東萊太守讚弟謙之有道術世祖敬重之故追贈
脩之安西將軍秦州刺史馮翊公賜命服謚曰哀公詔

秦雍二州為立碑於墓又贈脩之母為馮翊夫人及宗從追贈太守縣令侯子男者十六人其臨民者七郡五縣讚少以清素知名身長八尺姿容嚴凝非禮不動符堅僕射韋華州里高達雖年時有異恒以風味相待華為馮翊太守召為功曹後除襄邑令姚泓滅秦雍人千有餘家推讚為主歸順拜綏遠將軍魏郡太守其後秦雍之民來奔河南滎陽河內者戶至萬數拜讚安遠將軍南雍州刺史軹縣侯治于洛陽立雍州之郡縣以撫

之由是流民經負自遠而至三倍於前賜讚爵河南公
加安南將軍領護南蠻校尉仍刺史分洛豫二州之僑
郡以益之雖位高爵重而接待不倦初讚之未貴也嘗
從相者唐文相文曰君額上黑子入幘位當至方伯封
公及貴也文以民禮拜謁仍曰明公憶民疇昔之言乎
爾日但知公當貴然不能自知得為州民也讚曰徃時
卿言杜瓊不得官長人咸謂不然及瓊被選為整厓令
卿猶言相中不見而瓊果以暴疾未拜而終昔魏舒見

主人兒死自知已必至公吾常以卿言瓊之驗亦復不
息此望也乃賜文衣服良馬讚在州十七年甚獲公私
之譽年老表求致仕真君九年卒年八十六遺令薄葬
斂以時服世祖悼惜之謚曰宣穆

長子元寶襲爵為豫州別駕興安元年卒贈安南將軍
豫州刺史

子祖襲爵高祖時為安南將軍東徐州刺史卒

子靈孫襲楮陽太守

元寶弟虎皮有才器本縣令

虎皮弟臻字仙勝年十二遭父憂居喪以孝稱輕財好士顯祖末為中川太守時馮熙為洛州刺史政號貪虐仙勝微能附之甚得其意轉弘農太守後以母老屢求解任久乃從之高祖初母憂未闋以恒農大盜張煩等賊害良善徵為都將與荊州刺史公孫初頭等追捕之拜振武將軍北陽鎮將有威惠之稱遷建威將軍郢州刺史及高祖南遷郢州地為王畿除弘農太守坐受納

為御史所彈遂廢卒於家

長子祖訓順陽太守

祖訓弟治字祖禮自洛陽令稍遷鎮遠將軍東荊州刺史代下之後蠻民以刺史酈道元峻刻請治為刺史朝議以邊民宜悅乃以治代道元進號征虜將軍坐遣戍兵送道元免官治兄弟並孝友敦穆白首同居父亡雖久而猶於平生所處堂宇備設幃帳几杖以時節開堂列拜垂淚陳薦若宗廟然吉凶之事必先啓告遠出行

反亦如之治世宗末遷前將軍河州刺史在任數年遇
郤鐵忽反又為城民詣都列其貪狀十六條會赦免久
之兼廷尉卿又兼尚書畏避勢家承顏候色不能有所
執據尋遷金紫光祿大夫是時蠻反於三鵠治為都督
追討戰沒贈持節都督雍華岐三州諸軍事衛大將軍
七兵尚書雍州刺史昌平男

治弟彌兼尚書郎為城陽王徽所親待永安末徽避余
朱兆脫身南走歸命於彌彌不納遣人加害時論深責

之後沒關西

治長子肱之字長明自直後奉朝請再遷鎮遠將軍諫議大夫仍直後建義中出除冠軍將軍東荊州刺史兼尚書為荊郢行臺代遷除征虜將軍普泰中襲爵又為東荊州刺史永熙中鎮東將軍金紫光祿大夫武定四年卒年五十八

酈範字世則小名記祖范陽涿鹿人祖紹慕容寶濮陽太守太祖定中山以郡迎降授兗州監軍父嵩天水太

守範世祖時給事東宮高宗踐阼追錄先朝舊勲賜爵
永寧男加寧遠將軍以治禮郎奉遷世祖恭宗神主於
太廟進爵為子征南大將軍慕容白曜南征範為左司
馬師次無鹽劉彧戍主申纂憑城拒守識者僉以攻具
未周不宜便進範曰今輕軍遠襲深入敵境無宜淹留
久稽機候且纂必以我軍來速不去攻守謂方城可憑
弱卒可恃此天亡之時也今若外潛威形內整戎旅密
屬將士出其非意可一攻而剋之白曜曰一日縱敵數

世之患今若舒遲民心固矣司馬之策是也遂潛軍偽退示以不攻纂果不設備於是即夜部分旦便騰城崇朝而剋白曜將盡以其人為軍實範曰齊四履之地世號東秦不遠為經略恐未可定也今皇威始被民未濡澤連城有懷貳之將此邑有拒守之夫宜先信義示之軌物然後民心可懷二州可定白曜曰此良策也乃免之進次肥城白曜將攻之範曰肥城雖小攻則淹日得之無益軍聲失之有損威勢且見無鹽之卒死者塗炭

成敗之機足為鑒矣若飛書告喻可不攻自伏縱其不降亦當逃散白曜乃以書曉之肥城果潰白曜目範於衆曰此行也得卿三齊不足定矣軍達升城劉或太原太守房崇吉棄母妻東走或青州刺史沈文秀遣其寧朔將軍張元孫奉牋歸款請軍接援白曜將遣偏師赴之範曰桑梓之戀有懷同德文秀家在江南青土無墳栢之累擁衆數萬勁甲堅城彊則拒戰勢屈則走師未逼之朝夕無患竟何所畏已求援軍且觀其使詞煩而

顏愧視下而志怯幣厚言甘誘我也若不遠圖懼虧軍
勢既進無所取退逼彊敵羝羊觸藩羸角之謂未若先
守歷城平盤陽下梁鄒剋樂陵然後方軌連鑣揚旌直
進何患不壺漿路左以迎明公者哉白曜曰卿前後納
策皆不失衷今日之算吾所不取何者道固孤城裁能
自守盤陽諸戍勢不野戰文秀必剋殄意在先誠天與
不取後悔何及範曰短見猶謂不虛歷城足食足兵非
一朝可拔文秀既據東陽為諸城根本多遣軍則歷城

之固不立少遣衆則無以懼敵心脫文秀還叛閉門拒
守偏師在前為其所挫梁鄒諸城追擊其後文秀身率
大軍必相乘迫腹背受敵進退無途雖有韓白恐無全
理願更思審勿入賊計中白曜乃止遂表範為青州刺
史以撫新民後進爵為侯加冠軍將軍遷尚書右丞後
除平東將軍青州刺史假范陽公範前解州還京也夜
夢陰毛拂踝他日說之時齊人有占夢者曰史武進云
豪盛於齊下矣使君臨撫東秦道光海岱必當重牧全

齊再祿營邱矣範笑而荅曰吾將為卿必驗此夢果如其言是時鎮將元伊利表範與外賊交通高祖詔範曰卿身非功舊位無重班所以超遷顯爵任居方夏者正以勤能致遠雖外無殊效亦未有負時之愆而將鎮伊利妄生姦撓表卿造船市玉與外賊交通規陷卿罪窺覷州任有司推驗虛實自顯有罪者今伏其辜矣卿其明為算略勿復懷疑待卿別犯處刑及鞭今怒刑罷鞭止罰五十卿宜克循綏輯邊服稱朕意也還朝年六十

二卒於京師謚曰穆範五子道元在酷吏傳

道元第四弟道慎字善季涉歷史傳有幹略自奉朝請
遷尚書二千石郎中加威遠將軍為漢川行臺迎接降
款以功除員外常侍領郎中轉輔國將軍驍騎將軍出
為正平太守治有能名遷長樂相正光五年卒年三十
八贈後將軍平州刺史

子中字伯偉武定初司徒刑獄參軍

道慎弟道約字善禮起家奉朝請再遷冠軍將軍司徒

詔議參軍樸質遲鈍頗愛琴書性多造請好以榮利干
謁乞丐不已多為人所笑弄坎壈於世不免飢寒晚歷
東萊魯郡二郡太守為政清靜吏民安之年六十三武
定七年卒

範弟神虎尚書左民郎中

神虎弟夔字暉字幼和好學有文才尤長吏幹正光中
刺史裴延儁用為主簿令其修起學校又舉秀才射策
高第為奉朝請後延儁為討胡行臺尚書引為行臺郎

以招撫有稱除尚書外兵郎仍行臺郎及延儒解還行臺長孫雅又引為行臺郎加征虜將軍惲頗兼武用常以功名自許每進計於雅多見納用以功賞魏昌縣開國子邑三百戶惲在軍啓求減身官爵為父請贈詔贈夔征虜將軍安州刺史惲後與唐州刺史崔元珍固守平陽武泰中余朱榮稱兵赴洛惲與元珍不從其命為榮行臺郎中樊子鵠所攻城陷被害時年三十六世咸痛惜之所作文章頗行於世撰慕容氏書不成

子懷則武定末司空長流參軍

夔弟神期中書博士

神期弟顯度司州秀才尚書庫部郎

韓秀字白虎昌黎人也祖宰慕容儁謁者僕射父昞皇
始初歸國拜宣威將軍騎都尉秀歷吏任稍遷尚書郎
賜爵遂昌子拜廣武將軍高宗稱秀聰敏清辯才任喉
舌遂命出納王言并掌機密行幸遊獵隨侍左右顯祖
踐阼轉給事中參征南慕容白曜軍事延興中尚書奏

以敦煌一鎮介遠西北冠賊路衝慮或不固欲移就涼州羣官會議僉以為然秀獨謂非便曰此處國之事非關土之宜愚謂敦煌之立其來已久雖土隣彊寇而兵人素習縱有姦竊不能為害循常置戍足以自全進斷北狄之覘途退塞西夷之闕路若徙就姑臧慮人懷異意或貪留重遷情不願徙脫引寇內侵深為國患且敦煌去涼州及千餘里捨遠就近遙防有闕一旦廢罷是啓戎心則夷狄交構互相來往恐醜徒協契侵竊涼土

及近諸戍則關右荒擾烽警不息邊役煩興艱難方甚
乃從秀議太和初遷內侍長後為平東將軍青州刺史
假漁陽公在州數年卒子務襲爵

務字道世性端謹有治幹初為中散稍遷太子翊軍校
尉時高祖南征行梁州刺史楊靈珍謀叛以務為統軍
受都督李崇節度以討靈珍有戰功授後軍長史徵赴
行在所還遷長水校尉景明初假節行肆州事轉左中
郎將寧朔將軍試守常山郡又為征蠻都督李崇司馬

崇擯蕩羣蠻除近畿之患務有力焉後除鎮北府司馬
初試守常山府解復為平北長史務頗有受納為御史
中尉李平所劾付廷尉會赦免後除龍驤將軍郢州刺
史務獻七寶牀象牙席詔曰晉武帝焚雉頭裘朕常嘉
之今務所獻亦此之流也奇麗之物有乖風素可付其
家人邊人李旻馬道進等詐殺蕭衍黃坂戍主率戶來
降務信之遣兵千餘人迎接戶既不至而詐表破賊坐
以免官久之拜冠軍將軍太中大夫進號左將軍神龜

初卒

堯暄字辟邪上黨長子人也本名鍾葵後賜為暄祖僧
賴太祖平中山與趙郡呂舍首來歸國暄聰了美容貌
為千人軍將東宮吏高宗以其恭謹擢為中散奉使齊
州檢平原鎮將及長史貪暴事推情診理皆得其實除
太尉中給事兼北部曹事後轉南部太和中遷南部尚
書于時始立三長暄為東道十三州使更比戶籍賜獨
車一乘廐馬四匹時蕭蹟遣其將陳顯達寇邊以暄為

使持節假中護軍都督南征諸軍事平陽公軍次許昌
會陳顯達遁走暄乃班師暄前後從征及出使檢察三
十餘許度皆有克已奉公之稱賞賜衣服二十具綵絹
十匹紬絹千餘段奴婢十口賜爵平陽伯及改置百官
授太僕卿車駕南征加安南將軍轉大司農卿太和十
九年卒於平城高祖為之舉哀贈安北將軍相州刺史
賻帛七百匹初暄使徐州見州城樓觀嫌其華盛乃令
徃徃毀撤由是後更損落及高祖幸彭城聞之曰暄猶

可追斬

暄長子洪襲鎮北府錄事參軍

子桀字永壽元象中開府儀同三司樂城縣開國公

洪弟遵伏波將軍河州冠軍府長史臨洮太守卒贈龍

驤將軍謚曰思

遵弟榮員外散騎侍郎

子雄字休武元象中儀同三司豫州刺史城平縣開國

公

雄弟奮字彥舉興和中驃騎將軍潁州刺史


奮弟難宗武定中征西將軍南岐州刺史征羌縣開國伯

呂舍既歸國從至京師給賜田宅

子方生機識明辯卒於主書郎贈建武將軍定州刺史高邑子謚曰敬

子受恩為侍御中散典宜官曹累遷外都曹令轉北部給事秦州刺史卒於官

史臣曰薛辯冠讚歸身有道竝以款効見嘉議敦煌得
馭遠之算務武夫鄙詐貢牀飾寶棄而不御斯乃人主
之盛德堯暄聰察奉公以致名位禮加存歿有餘榮矣



魏書卷四十二

魏書卷四十二考證

酈範傳長孫雅又引為行臺郎○北史行臺長孫承業

引為行臺郎

臣人龍

按本書長孫道生傳子抗抗子

觀觀子冀歸高祖以其幼承家業賜名稚字承業北
史書其字而此又改作雅疑唐臣避高宗嫌名而易
其文

魏書卷四十二考證

欽定四庫全書

史部

魏書卷四十三至

詳校官編修臣溫汝适

洗馬臣王坦修覆勘

覆校官中書臣孫希旦

校對官中書臣陳林

謄錄監生臣周元灝

欽定四庫全書

魏書卷四十三

齊

魏

收

撰

列傳第三十一

嚴稜

毛脩之

唐和

劉休賓

房法壽

嚴稜馮翊臨晉人遇亂避地河南劉裕以為廣威將軍

陳留太守戍倉垣秦常中山陽公奚斤南討軍至潁川

稜率文武五百人詣斤降驛送稜朝太宗於冀州嘉其

誠款拜平遠將軍賜爵邵陽侯假荊州刺史隨駕南討
還為上客及世祖踐祚以稜歸化之功除中山太守有
清廉之稱年九十卒於家

子稚玉襲爵真君中詔稚玉副長安鎮將元蘭率衆一
萬迎漢川附化之民入自斜谷至甘亭劉義隆梁州刺
史王元載遣將拒嶮路不得通班師太和二年太倉令
五年出為平南將軍東兗州刺史假馮翊公卒

子曇襲爵

毛脩之字敬文滎陽陽武人也父瑾司馬德宗梁秦二
州刺史劉裕之擒姚泓留子義真鎮長安以脩之為司
馬及赫連屈丐破義真於青泥脩之被俘遂沒統萬世
祖平赫連昌獲脩之神廬中以脩之領吳兵討蠕蠕大
檀以功拜吳兵將軍領步兵校尉後從世祖征平涼有
功遷散騎常侍前將軍光祿大夫脩之能為南人飲食
手自煎調多所適意世祖親待之進太官尚書賜爵南
郡公加冠軍將軍常在太官主進御膳從討和龍別破

三堡賜奴婢牛羊是時諸軍攻城宿衛之士多在戰陳
行宮人少雲中鎮將朱脩之劉義隆故將也時從在軍
欲率吳兵謀為大逆因入和龍冀浮海南歸以告脩之
脩之不聽乃止是日無脩之大變幾作朱脩之遂亡奔
馮文通又以脩之收三堡功多遷特進撫軍大將軍金
紫光祿大夫位次崔浩之下浩以其中國舊門雖學不
博洽而猶涉獵書傳每推重之與共論說言次遂及陳
壽三國志有古良史之風其所著述文義典正皆揚于

王廷之言微而顯婉而成章班史以來無及壽者脩之
曰昔在蜀中聞長老言壽曾為諸葛亮門下書佐被捷
百下故其論武侯云應變將畧非其所長浩乃與論曰
承祚之評亮乃有故義過美之譽案其迹也不為負之
非挾恨之矣何以云然夫亮之相劉備當九州鼎沸之
會英雄奮發之時君臣相得魚水為喻而不能與曹氏
爭天下委棄荊州退入巴蜀誘奪劉璋偽連孫氏守窮
蹊蹠之地僭號邊夷之間此策之下者可與趙他為偶

而以為管蕭之亞匹不亦過乎謂壽賤亮非為失實且亮既據蜀恃山嶮之固不達時宜弗量勢力嚴威切決控勒蜀人矜才負能高自矯舉欲以邊夷之衆抗衡上國出兵隴右再攻祁山一攻陳倉踈遲失會摧衄而反後入秦川不復攻城更求野戰魏人知其意閉壘堅守以不戰屈之知窮勢盡憤結攻中發病而死由是言之豈合古之善將見可而進知難而退者乎脩之謂浩言為然太延二年為外都大官卒謚曰恭公脩之在南有

四子唯子法仁入國高宗初為金部尚書襲爵後轉殿中尚書加散騎常侍法仁言聲壯大至於軍旅田狩唱呼處分振於山谷和平六年卒贈征東大將軍南郡王謚曰威

長子猛虎太安中為東宮主書轉中舍人又遷中散大夫初襲爵為散騎常侍皇興中蠕蠕犯塞從顯祖討之有勇決之稱太和初卒贈豫州刺史謚曰康公

子泰寶襲爵征虜長史例降為侯卒

子乾祐襲

朱脩之者劉義隆司徒從事中郎守滑臺安頡圍之其母在家乳汁忽出母號慟告家人曰我年老非復有乳汁之時今忽如此兒必歿矣果以其日為頡所擒世祖善其固守授以內職以宗室女妻之而佞巧輕薄為人士所賤為雲中鎮將及入馮文通文通送之江南

唐和字稚起晉昌宜安人也父繇以涼土喪亂民無所歸推隴西李暉於敦煌以寧一州李氏為沮渠蒙遜所

滅和與兄契攜外甥李寶避難伊吾招集民衆二千餘
家臣於蠕蠕蠕蠕以契為伊吾王經二十年和與契遣
使來降為蠕蠕所逼遂擁部落至于高昌蠕蠕遣部帥
阿若率騎討和至白力城和率騎五百先攻高昌契與
阿若戰歿和收餘衆奔前部王國時沮渠安周屯橫截
城和攻拔之斬安周兄子樹又剋高寧白力二城斬其
戍主遣使表狀世祖嘉其誠款屢賜和和後與前部王
車伊洛擊破安周斬首三百世祖遣成周公萬度歸討

焉耆詔和與伊洛率所領赴度歸和奉詔會度歸喻下
柳驢以東六城因共擊波居羅城拔之後同征龜茲度
歸令和鎮焉耆時柳驢戍主乙真伽率諸胡將據城而
叛和領輕騎一百匹入其城擒乙真伽斬之由是諸胡
款附西域剋平和有力也正平元年和詣闕世祖優寵
之待以上客高宗以和歸誠先朝拜鎮南將軍酒泉公
太安中出為濟州刺史甚有稱績徵為內都大官評決
獄訟不加捶楚察疑獲實者甚多世以是稱之皇興中

卒年六十七贈征西大將軍太常卿酒泉王謚曰宣

子欽字益直中書學生襲爵太和中拜鎮南將軍長安鎮副將轉陝州刺史將軍如故後降爵為侯二十年卒子景宣襲爵歷并州城陽王徽後軍府長史加中堅將軍遷東郡太守普泰中卒贈撫軍將軍秦州刺史

景宣弟季弼武定中滄州別駕

契子玄達性果毅有父風與叔父和歸闕俱為上客拜安西將軍晉昌公顯祖時出為華州刺史將軍如故杏

城民蓋平定聚衆為逆顯祖遣給事楊鍾葵擊平定不剋而還詔玄達討平之杏城民成赤李又聚黨自號為王逼掠郡縣殘害百姓玄達率騎二百邀其狹路擊破之叛民曾平原復聚為亂玄達追擊悉平之延興二年有罪免官太和十六年降爵為侯卒

子崇字繼祖襲爵盛樂太守

崇弟興業定陽闡熙二郡太守

劉休賓字處幹本平原人祖昶從慕容德度河家于北

海之都昌縣父奉伯劉裕時北海太守休賓少好學有文才兄弟六人乘民延和等皆有時譽休賓為劉彧虎賁中郎將稍遷幽州刺史鎮梁鄒及慕容白曜軍至升城遣人說之令降休賓不從劉彧龍驤將軍崔靈延行渤海郡房靈建等數十家皆入梁鄒同舉休賓為征虜兗州會劉彧遣使授休賓輔國將軍兗州刺史休賓妻崔邪利女也生一男字文暉崔氏先歸寧在魯郡邪利之降也文暉母子遂與俱入國至是白曜表請崔與文

曄既至白曜以報休賓又於北海執延和妻子送至梁
鄒巡視城下休賓答白曜許歷城降當即歸順密遣兼
主簿尹文達向歷城觀國軍形勢文達詣白曜詐言聞
王臨境故來祇候私謂白曜曰劉休賓父子兄弟累郡
連州今若識運知機束手歸化不審明王加何賞敘白
曜曰休賓仕南爵寵如此今若不勞兵甲望風自降者
非直處卿富貴兼還其婦兒休賓縱令不畏攻圍豈不
憐其妻子也今升城卿自往見文達乃至升城見休賓

妻子文晔攀援文達哭泣號咷以爪髮為信文達回還復經白曜誓約而去白曜曰卿是休賓耳目腹心親見其妻子又知我衆旅少多善共量議自求多福文達還見休賓出其妻兒爪髮兼宣白曜所言及國軍形勢謂休賓曰升城已敗歷城非朝則夕公可早圖之休賓撫爪髮泣涕曰妻子幽隔誰不愍乎吾荷南朝厚恩受寄邊任今顧妻子而降於臣節足乎然而密與其兄子聞慰議為降計聞慰曰此故當文達誑詐耳年常抄掠豈

有多軍也但可撫彊兵勤肅衛方城狹嶮何為便生憂
怯示人以弱也休賓又謂文達曰卿勿憚危苦更為吾
作一返善觀形勢於是遣文達偷道而出令與白曜為
期剋日許送降款文達既至白曜喜曰非直休賓父子
荷縈城內賢豪亦隨人補授卿便即為梁鄒城主以酒
灌地啟告山河曰若負休賓使我三軍覆沒初白曜之
表取休賓妻子也顯祖以道固既叛詔授休賓持節平
南將軍冀州刺史平原公至是付文達詔策文達還謂

休賓曰白曜信誓如此公可早為決計恐攻逼之後降
悔無由休賓於是告兄子聞慰曰事勢可知汝早作降
書聞慰沉疑因執不作遂差本契白曜尋遣著作佐郎
許赤虎夜至梁鄒南門下告城上人曰汝語劉休賓何
由遣文達頻造僕射許送降文歸誠大化何得無信違
期不來於是門人唱告城內悉知遂相維持欲降不得
皆云劉休賓父子欲以我城內人易榮位也尋被攻逼
經冬至春歷城降白曜遣道固子景業與文暉至城下

休賓知道固降乃出請命白曜送休賓及宿有名望者十餘人俱入代都為客及立平齊郡乃以梁鄒民為懷寧縣休賓為縣令延興二年卒

文曄有志尚綜覽羣書輕財重義太和中坐從兄聞慰南叛與二弟文顯季友被徙北邊高祖特聽還代高祖曾幸方山文曄大言於路側曰求見聖明申宣久屈高祖遣尚書李冲宣詔問曰卿欲何言聽卿面自申盡於是引見文曄對曰臣之陋族出自平原徃因燕亂流離

河表居齊以來八九十載真君十一年世祖太武皇帝
巡江之日時年二歲隨外祖魯郡太守崔邪利於鄒山
歸國邪利蒙賜四品除廣寧太守以臣年小不及齒錄
至天安之初皇威遠被臣亡父休賓劉氏持節兗州刺
史戍梁鄒時慕容白曜以臣父居全齊之要水陸道衝
青冀二城往來要路三城岳峙竝拒王師白曜知臣母
子先在代京表請臣母子慰勞臣即被先帝詔遣乘傳
詣軍又賜亡父官爵白曜遣右司馬盧河內等送臣母

子至鄒臣既見亡父備申皇澤云吾蒙本朝寵遇捍禦藩屏尊卑百口竝在二城吾若先降百口必被誅滅既不固誠於本朝又令尊卑塗炭豈堪為人臣以奉大魏乎汝且申吾意白僕射降意已判平歷城即率士衆送欸軍前既剋歷城白曜遣赤虎送臣并崔道固子景業等向梁鄒亡父既見赤虎之信仰感聖朝遠遣妻子又知天命有歸擁衆一萬以城降欸乘驛赴臺蒙為客例臣私釁深重亡父以延興二年孤背明世血誠微心未

獲申展如臣等比竝蒙榮爵為在事孤抑以人廢勲高
祖曰卿訴父賞而卿父無勲歷城齊之西關歸命請順
梁鄒小戍豈能獲全何足以為功也文暉對曰誠如聖
旨愚臣所見猶有未申何者昔樂毅破齊七十餘城唯
有即墨獨在此豈非根亡而條立且夫降順之人驗之
古今未有不由危逼者故黃權無路歸欵列地封侯且
薛安都畢衆敬危急投命竝受茅土之爵論古則如彼
語今則如此明明之世不及比流竊惟梁鄒嚴固地據

中齊粟支十載控弦數千萬方之升城不可同日而語
升城猶能抗兵累旬傷殺甚衆若臣亡父固守孤城則
非一朝可剋高祖曰歷城既陷梁鄒便是掌中何煩兵
力對曰若如聖旨白曜便應窮兵極意取勝俯仰何為
上假赤虎之信下街知變之民高祖曰卿父此勲本自
至少以卿才地豈假殷勤對曰臣尫愚六蔽文武無施
響絕九臯聞天無日遭逢聖運萬死猶生但臣竊見徐
克是賊藩要徐克既降諸戍皆應國有而東徐州刺史

張讜所戍團城領二郡而已徐克降後猶閉門拒命授
以方嶽始乃歸降父子二人竝蒙侯爵論功比勤不先
臣父高祖曰卿引張讜讜事小異對曰臣未識異狀高
祖曰張讜始來送款終不差信卿父進非先覺退又拒
守何得不異對曰張讜父子始有歸順之名後有閉門
之罪以功補過免罪為幸臣又見崔僧祐母弟隨其叔
父道固在歷城僧祐遙聞王威遠及恐母弟淪亡督率
鄉閭來欲救援既至郁洲歷城已沒束手歸誠救母弟

之命聖朝嘉其附化賞以三品亡父之誠豈後僧祐高祖曰僧祐身居東海去留任意來則有位去則他人是故賞之卿父被圍孤城已是已物所以不賞對曰亡父據城歸國至公也僧祐意計而來為私也為私蒙賞至公不酬臣未見其可高祖笑而不言比部尚書陸叡叱文暉曰假令先朝謬賞僧祐豈可謬相賞也文暉曰先帝中代聖主與日月等曜比隆堯舜宰相則十亂五臣今言謬賞豈不仰誣先朝乎尚書高閎曰卿謂母弟與

妻子何者為重文曄曰母弟為重閭曰卿知母弟為重朝廷賞僧祐是也卿父為妻子而來事何相反對曰僧祐若無母弟來歸以不閭曰不來文曄曰若僧祐赴母弟之難此是其私而亡父本為大丈夫立身處世豈可顧妻子而虧高節也昔樂羊食子有顧以不亡父本心實不垂顧所以歸化者自知商周不敵天命有所歸高祖謂文曄曰卿之所許頗亦有途賞從重罰從輕尋勅酬叙文曄泣曰臣愚頓理極再見無期陛下既垂慈澤

願勅有司特賜矜理高祖曰王者無戲何得懃懃既而
賜文曄爵都昌子深見待遇拜協律郎中改授羽林監
世宗世除高陽太守延昌中卒贈平遠將軍光州刺史
謚曰貞

子元襲拜員外郎襄威將軍青州別駕卒

文顯性仁孝篤厚徐州安豐王府騎兵參軍季友南青
州左軍府錄事參軍

聞慰博識有才思至延興中南叛

休賓叔父旋之其妻許氏二子法鳳法武而旋之早亡
東陽平許氏攜二子入國孤貧不自立竝疎薄不淪為
時人所棄母子皆出家為尼既而反俗太和中高祖選
畫物望河南人士才學之徒咸見申擢法鳳兄弟無可
收用不蒙選授後俱奔南法武後改名孝標云

房法壽小名烏頭清河繹幕人也幼孤少好射獵輕率
勇果結羣小而為劫盜從叔元慶範鎮等坐法壽被州
郡切責時月相繼宗族甚患之弱冠州迎主簿後以母

老不復應州郡之命常盜殺牯牛以供其母招集壯士常有百數母亡歲餘遇沈文秀崔道固起兵應劉子勛明僧暲劉乘民起兵應劉彧攻討文秀法壽亦與清河太守王元邈起兵西屯合討道固元邈以法壽為司馬累破道固軍甚為歷城所憚加法壽綏邊將軍魏郡太守子勛死道固文秀悉復歸彧乃罷兵道固慮其扇亂百姓遂切遣之而法壽外託裝辦而內不欲行會從弟崇吉在升城為慕容白曜所破母妻沒於白曜軍崇吉

奔還舊宅法壽與崇吉年志粗相諧協而親則從祖兄弟也崇吉以母妻見獲託法壽為計法壽既不欲南行恨道固逼切又矜崇吉情理時道固以兼治中房靈賓督清河廣川郡事成盤陽法壽遂與崇吉潛謀襲靈賓克之仍歸款於白曜以贖母妻白曜遣將軍長孫觀等自大山南入馬耳關以赴盤陽還崇吉母妻初道固遣軍圍盤陽法壽等拒守二十餘日觀軍至賊乃散去觀軍入城詔以法壽為平遠將軍與韓麒麟對為冀州刺

史督上租糧以法壽從父弟靈民為清河太守思順為濟南太守靈悅為平原太守伯憐為廣川太守叔玉為高陽太守叔玉兄伯玉為河間太守伯玉從父弟思安為樂陵太守思安弟幼安為高密太守以安初附及歷城梁鄒降法壽崇吉等與崔道固劉休賓俱至京師以法壽為上客崇吉為次客崔劉為下客法壽供給亞於安都等以功賜爵壯武侯加平遠將軍給以田宅奴婢性好酒愛施親舊賓客率同飢飽坎壈常不豐足畢衆

敬等皆尚其通愛太和中卒贈平東將軍青州刺史謚敬侯

子伯祖襲例降為伯歷齊郡內史伯祖闇弱委事於功曹張僧皓僧皓大有受納伯祖衣食不充後廣陵王羽為青州伯祖為從事郎中平原相轉幽州轉國長史坐公事免官卒

子翼襲宣威將軍大城戍主永安中青州太傅開府從事中郎

伯祖弟叔祖別以功賜爵魏昌子歷廣陵王國郎中令
長廣東萊二郡太守龍驤將軍中散大夫永安中安東
將軍郢州刺史

叔祖弟幼愍安豐新蔡二郡太守坐事奪官居家忽聞
有客聲出無所見還至庭中為家羣犬所噬遂卒初長
孫觀之將至盤陽也城中稍以震懼時劉彧給事中崔
平仲欲歸江南自歷下至圍城軍中與十餘騎遙共法
壽語靈賓密遣人捕執之始法壽克盤陽之後常禁靈

賓於別齋既得平仲引與同室致酒食叙國軍明將入
意夜中北城上絕出平仲靈賓等十餘人厥明官軍至
城靈賓遂歸梁鄒

靈賓文藻不如兄靈建而辯悟過之靈建在南官至州
治中渤海太守以才名見稱兄弟俱入國為平齊民雖
流漂屯圯操尚卓然竝卒於平齊

靈建子宣明亦文學著稱雅有父風高祖擢為中書博
士遷洛轉議郎試守東清河郡正始中京兆王愉出除

征東冀州以宣明為記室參軍愉反逼宣明為太守

靈賓從父弟堅字千秋少有才名亦內徙為平齊民太和初高祖擢為祕書郎遷司空諮議齊州大中正高祖臨朝令諸州中正各舉所知千秋與幽州中正陽尼各舉其子高祖曰昔有一祁名垂往史今有二奚當聞來牒出為濮陽太守世宗時復為司空諮議加立忠將軍卒贈南青州刺史謚曰懿

長子祖淵羽林監從章武王融討葛榮沒於陳贈安東

將軍濟州刺史

祖淵弟祖皓長水校尉後討蕭衍將於九山戰歿贈撫軍將軍兗州刺史

崔平仲自東陽南奔妻子於歷城入國太和中高祖聽其還南

思安有勇力伯玉果敢有將畧思安賜爵西安子建威將軍北平太守遷大司馬司馬齊州武昌王府司馬高祖南伐徵為步兵校尉直閣將軍中統軍善撫士衆高

祖嘉之漢陽既平復為武昌王司馬帶東魏郡太守加
寧朔將軍改爵清河子卒官子敬寶襲爵

敬寶亦壯健奉朝請征北中兵參軍北征統軍寧遠府
軍每有戰功早卒

子去病襲

伯玉坐弟叔玉南奔徙於北邊後亦南叛為蕭鸞南陽
太守高祖南伐剋宛外城命舍人公孫延景宣詔於伯
玉曰天無二日土無兩王是以躬總六師蕩一四海宛

城小戍豈足以禦抗王威深可三思封侯胙土事在俯仰伯玉對曰外臣荷國厚恩奉任疆境為臣之道未敢聽命伏惟遊鑒遠涉願不損神高祖又遣謂曰朕親率麾旆遠清江沔此之小戍豈足徘徊王師但戎輅所經纖介須殄宜量力三思自求多福且卿早蒙蕭躋殊常之眷曾不懷恩報以塵露蕭鸞妄言入繼道成躋子無子遺卿不能建忠於前君方立節於逆豎卿之罪一又頃年傷我偏師卿之罪二今鑒旆親戎清一南服不先

面縛待罪麾下卿之罪三卿之此戍多則一年中則百
日少則三旬剋殄豈遠宜善思之後悔無及伯玉對曰
昔蒙武帝愷悌之恩忝侍左右此之厚遇無忘夙夜但
繼主失德民望有歸主上龍飛踐極光紹太宗非直副
億兆之深望實兼武皇之遺勅是以懃懃懇懇不敢失
墜往者北師深入寇擾邊民輒屬將士以救蒼生此乃
邊戍常事陛下不得垂責及剋宛伯玉面縛而降高祖
引見伯玉并其參佐二百人詔伯玉曰朕承天馭宇方

欲清一寰域卿最爾小成敢拒六師卿之愆罪理在不
赦伯玉對曰臣既小人備荷驅使緣百口在南致拒皇
畧罪合萬死高祖曰凡立忠抱節皆應有所至若奉逆
君守迷節古人所不為卿何得事逆賊蕭鸞自貽伊譴
伯玉對曰臣愚癡晚悟罪合萬斬今遭陛下願乞生命
高祖曰凡人惟有兩途知機獲福背機受禍勞我王師
彌歷歲月如此為降何人有罪且朕前遣舍人公孫延
景城西共卿語云天無二日土無二王卿答云在此不

在彼天道攸遠變化無方卿寧知今日在此不在彼乎
伯玉乞命而已更無所言高祖以思安頻為伯玉泣請
故特宥之伯玉在南之日放妾楊氏為尼入國遂令還
俗復愛幸焉為有司所奏高宗聽之世宗即位拜長史
兼游擊將軍出為馮翊相卒官

崇吉少驍勇為沈文秀中兵參軍及太原戍守傅靈越
率衆棄郡南赴子勛文秀以崇吉督郡事既而背文秀
同於劉彧母叔在歷城為崔道固所拘繫又將致刑於

市以恐之而崇吉卒無所顧會道固歸或乃出其母或
以崇吉為龍驤將軍并州刺史領太原太守戍升城崇
吉以其從兄靈獻為長史姨兄賈延年為司馬未幾而
白曜軍至白曜遣人招之崇吉不降遂閉門固守升城
至小人力不多勝仗者不過七百人而白曜侮之乃遣
衆陵城崇吉設土葦方梁下相舂擊不時剋殄白曜遂
築長城圍三重更造攻具日夜攻擊自二月至四月糧
矢俱盡崇吉突圍出走遁藏民舍母妻見獲道固遣治

中房靈省慰引之崇吉不肯見道固遂東歸舊村陰募壯士欲以偷毋還奔河南白曜慮其如此守備嚴固後與法壽取盤陽俱降及立平齊郡以歷城民為歸安縣崇吉為縣令頗懷昔憾與道固接事意甚不平後委縣出臺訟道固罪狀數條會赦不問崇吉乞解縣許之停京師半歲乃南奔崇吉夫婦異路剃髮為沙門改名僧達投其族叔法延住歲餘清河張畧之亦豪俠士也崇吉遺其金帛得以自遣妻從幽州南出亦得相會崇吉

至江東尋病死

崇吉從父第三益字敬安於南陽內附高祖與語善之
曰三益了了殊不惡拜員外散騎侍郎尋出為太山太
守遷兗州左軍府司馬所在以清和著稱還除左將軍
正光中卒年六十三九子

長子士隆興和中東清河太守帶盤陽鎮將

士隆弟士達少有才氣其族兄景先有鑒識每曰此兒
俶儻終當大其門戶起家濟州左將軍府倉曹參軍時

京兆王繼為大將軍出鎮關右聞其名徵補騎兵參軍
領帳內統軍孝昌中其鄉人劉蒼生劉鈞房須等作亂
攻陷郡縣頻敗州軍時士達父憂在家刺史元欣欲逼
其為將士達以禮固辭欣乃命其友人馮元興謂之曰
今合境從逆賊徒轉熾若萬一陷州君家豈得獨全既
急病如此安得顧名教也士達不得已而起率州郭之
人二千餘人東西討擊悉破平之武泰初就家拜平原
太守抑挫豪彊境內肅然時邢杲寇亂憚其威名越郡

城西度不敢攻逼永安末轉濟南太守士達不入京師而頻為本州郡時人榮之永安末朱兆入洛刺史蕭贊為城民趙洛周所逐城內無主洛周等以士達鄉情所歸乃就郡請之命攝州事永熙二年卒年三十八時人傷惜之贈平東將軍齊州刺史謚曰武

士達弟士素武定末太尉諮議參軍

士素弟士章尚書郎

法壽族子景伯字長暉高祖諱避地渡河居於齊州之

東清河繹幕焉祖元慶仕劉駿歷七郡太守後為沈文秀青州建威府司馬劉或之殺子業自立也子業弟子勛起兵攻之文秀遣其將劉珍之率兵助或後背或歸于子勛元慶不同為文秀所害父愛親率勒鄉部攻文秀劉或嘉之起家授龍驤將軍尋會文秀降或乃止顯祖時三齊平隨例內徙為平齊民以父非命疏服終身景伯生於桑乾少喪父以孝聞家貧傭書自給養母甚謹尚書盧淵稱之於李冲冲時典選拔為奉朝請司空

祭酒給事中尚書儀曹郎除齊州輔國長史值刺史死
勅行州事政存寬簡百姓安之後值清河太守杜昶外
叛郡居山嶮盜賊羣起除清河太守郡民劉簡虎曾失
禮於景伯聞其臨郡闔家逃亡景伯督切屬縣捕擒之
即署其子為西曹掾命喻山賊賊以景伯不念舊惡一
時俱下論者稱之舊守令六年為限限滿將代郡民韓
靈和等三百餘人表訴乞留復加二載後遷太尉中郎
司徒諮議參軍輔國將軍司空長史以母疾去官景伯

性淳和涉獵經史諸弟宗之如事嚴親及弟妓亡蔬食終喪菽不內御憂毀之容有如居重其次弟景先亡其幼弟景遠菽年哭臨亦不內寢鄉里為之語曰有義有禮房家兄弟廷尉卿崔光韶好標榜人物無所推尚每云景伯有士大夫之行業及母亡景伯居喪不食鹽菜因此遂為水病積年不愈孝昌三年卒于家時年五十贈左將軍齊州刺史

子文烈武定中尚書三公郎中

景先字光胄幼孤貧無資從師其母自授毛詩曲禮年
十二請其母曰豈可使兄傭賃以供景先也請自求衣
然後就學母哀其小不許苦請從之遂得一羊裘忻然
自足晝則樵蘇夜誦經史自是精勤遂大通瞻太和中
例得還鄉郡辟功曹州舉秀才值州將卒不得對策解
褐太學博士時太常劉芳侍中崔光當世儒宗歎其精
博光遂奏兼著作佐郎修國史尋除司徒祭酒員外郎
侍中穆紹又啟景先撰世宗起居注累遷步兵校尉領

尚書郎齊州中正所歷皆有當官之稱景先沉敏方正
事兄恭謹出告反面晨昏參省側立移時兄亦危坐相
敬如對賓客兄會寢疾景先侍湯藥衣冠不解形容毀
瘁親友見者莫不哀之神龜元年蕭衍龍驤將軍田甲
能據東義陽城內屬勅景先為行臺發二荆兵以援之
在軍遇疾而還其年卒於家時年四十三贈持節冠軍
將軍洛州刺史謚曰文景先作五經疑問百餘篇具言
該典今行於時文多略舉其切於世教者

問王者受命木火相生曰五精代感稟靈者興金德方
隆禎發華渚水運告昌瑤光啟祚人道承天天理應實
受謝既彰玄命若契相生之義有允不違至如湯武革
命殺伐是用水火為次遵而不改既事乖代終而數同
納麓逆順且殊禎運宜異而兆徵不差有疑符應

問禹以鯀配天舜不尊父曰明明在上下土是冒道高
者負辰四方神積者郊原斯主是以則天不能私其子
紹堯不敢尊其父鯀既罪彰於山川受殛於羽裔化質

與鱗甲為羣銘精不能上乘箕尾而厚尊配於國陽當
升煙之大禮苟存及躬以亂祀典降上帝為罪鬼之賓
奏夾鍾為介蟲之樂奉天之道不乃有淪乎

問湯尊稷廢柱曰神積道存異世同尊列山見享綿紀
前代成湯革命承天當愆陽之運不思理數之有時黜
元功於百世且畢箕感應風雨異徵尊播殖之靈而邀
滂澍之潤升廢之道無乃謬與若柱不合薦虞夏應失
之於前如以歲久宜遷百神可計日而代求之二三未

究往旨

問湯剋桀欲遷夏社為不可武王滅紂以亳社為亡國
之誡曰神無定方唯人為主道協無為天地是依棄德
弗崇百靈更祀周武承天禮存咸秩升后稷當四圭之
尊貶土祗隔牲幣之享就如言之稷稟靈威誠允聿追
之宜社非商祖孝孚乃考之咎殷鑒致誠何獨在斯

問易著革命之爻而無揖讓之象曰玄黃剖別人道為
尊舍靈佇化故義始元首是以飛龍啟徵大人載就及

理運相推帝圖異序虞賓以為善終順守有慙未盡不
顯揖讓之象而著已日之美豈可兆巨釁為貽厥之謀
訓萬世而開安忍之

闕一字

求之反衷未識理恕

問周禮秋官司烜氏邦若屋誅為明竈焉曰王道貴產
法理尚恩舊德見食八象載其美五宥三刺禮經寶其
仁是以祿父巨釁殷禮不輟三監亂德蔡胤猶存罪莫
極於無上逆莫甚於違天行大辟禍不及族理正刑愆
止於身何惡當參夷之禍何戾受淪殄之辜

問儀禮繼母出嫁從為之服傳云貴終其恩曰繼母配父本非天屬與尊合德名義以興兼鞠育有加禮服是重既體違義盡棄節毀慈作嬪異門為鬼他族神道不全何終恩之有方齊服是追哭於野次苟存降重無乃過猶不及乎

問禮記生不及祖父母父母稅喪已則否曰服以恩制禮由義立慈母三年孫無緦葛者以戚非天屬報養止身祖雖異域恩不及已但正體於下可無服乎且縞冠

玄武子姓之服縗練之後縗經已除猶懷慘素未忍從
吉況斬焉初之創巨方始復弔之賓尚改緇襲奉哀苦
次而無追變孝子孝孫豈天理是與

問左氏傳齊人殺哀姜君子以為不可曰受醢從天人
倫所重保育異宗承奉郊奠而乃肆極昏淫禍傾合
之尊怙亂無終殄滅誕鞠之愛齊桓匡翼四方正存刑
矩割不忍之恩行至公之法方生貶違以殺為甚而神
道幽默禍降未期雖窮勃履朝臣不宜糾既事反人靈

咎將有所施之取衷孰為優允

問公羊傳王者之後郊天曰神不謬享帝無妄尊介丘
偏祀猶不歆季氏之旅昊天至重豈可納廢饗之虔唐
虞已往事無斯典三后已降始見其文揖讓之胄禮不
上通昏禰後燼四主是主此便至道相承乾無二統純
風既誠玄牡肆尊禮不虛草庶昭異聞

問穀梁傳魯僖三十一年夏四月卜郊不從乃免牲傳
曰乃者亡乎人之辭也日樂以觀風禮為教本其細已

甚民不堪命齊不加兵屈於周典僖公魯之盛君告誠
虔祀穆卜迎吉而休徵不至若推咎於天則神不棄鑒
歸愆於人則頌聲宜替既命龜失辰靈威弗眷郊享不
從配天斯缺即傳所言殆非虛美何承而制

問尚書胤征羲和詰其罪乃季秋月朔辰弗合於房曰
衡紀不移日月有度炎涼啟辰次舍無代履端屢臻歸
餘成閏是以爰命羲和升準徂節使晷數應時火流協
運致望舒後律耀靈爽次即官闕永容可為愆玄象一

差未成巨戾且杪秋豈回星之辰授衣非合璧之月叙
食弗當積失加誅律度暫差便邁殄絕仁者之兵義不
妄興王赫斯舉將有異說

問毛詩十月之交朔日辛卯日有食之亦孔之醜曰日
月次周行舍有常分至之候不為愆咎今同之辰而為
深戾者專以金木相殘指日成釁推步不一容可如之
若謫見正陽日維戊午生育相因猶子歸母但以陰陽
得無深忌乎若為忌也朔亦應為災如不忌也辛卯豈

獨成醜且舉凡之始以屬月時繫之在日有爽明例義
不妄構理用何依

問論語河不出圖泣麟自傷曰聖人稟靈天地資識未
形齊生死於一同等榮辱於彼我孔子自生不辰從心
告齒樂正既修素王斯著方興吾已之歎結反袂之悲
進涉無上之心退深負杖之懼聖達之理無乃缺如符
璽郎王神貴答之名為辯疑合成十卷亦有可觀前廢
帝時奏上之帝親自執卷與神貴往復嘉其用心特除

神貴子鴻彥為奉朝請

景先子延祐武定末太子家令

景遠字叔遐重然諾好施與頻歲凶儉分贍宗親又於
通衢以食餓者存濟甚衆平原劉郁行經齊兗之境忽
遇劫賊已殺十餘人次至郁郁呼曰與君鄉近何忍見
殺賊曰若言鄉里親親是誰郁郁曰齊州主簿房陽是我
姨兄陽是景遠小字賊曰我食其粥得活何得殺其親
遂還衣服蒙活者二十餘人景遠好史傳不為章句天

性小急不類家風然事二兄至謹撫養兄孤恩訓甚篤
益州刺史傅豎眼慕其名義啟為昭武府功曹參軍以
母老不應豎眼頗恨之卒於家

子敬道永熙中開府參軍事

史臣曰嚴稜夙款可嘉脩之晚有誠効唐和萬里慕義
歸身著績休賓窮而委質法壽伯玉未能投命景伯兄
弟儒風雅業良可稱焉

魏書卷四十三

魏書卷四十三考證

劉休賓傳母子皆出家為尼○北史母子皆出家為尼

僧此少僧字

房法壽傳法壽族子景伯字長暉○長北史作良

魏書卷四十三考證

欽定四庫全書

魏書卷四十四

齊

魏

收

撰

列傳第三十二

羅結 伊馱 乙瓌 和其奴 苟顏

薛野睹 宇文福 費于 孟威

羅結代人也其先世領部落為國附臣劉顯之謀逆也
太祖去之結翼衛鑾輿從幸賀蘭部後以功賜爵屈虵

侯太宗時除持節散騎常侍寧南將軍河內鎮將世祖
初遷侍中外都大官摠三十六曹事年一百七歲精爽
不衰世祖以其忠慤甚見信待監典後宮出入卧內因
除長信卿年一百一十詔聽歸老賜大甯東川以為居
業并為築城即號曰羅侯城至今猶在朝廷每有大事
驛馬詢訪焉年一百二十歲卒贈寧東將軍幽州刺史
諡曰貞

子斤太宗時為侍御中散後從世祖討赫連昌世祖追

奔入城昌邀擊左右多死斤力戰有功世祖嘉之後錄
勲除散騎常侍侍中四部尚書又加平西將軍後平涼
州攻城野戰多有克捷以功賜爵帶方公除長安鎮都
大將會蠕蠕侵境馳驛徵還除柔玄鎮都大將後以斤
機辯勅與王俊使蠕蠕迎女備後宮又以本將軍開府
為長安鎮都大將卒贈本將軍雍州刺史諡曰靜陪葬
金陵

子敦襲爵有姿貌善舉止自太子洗馬稍遷散騎常侍

庫部尚書卒贈安東將軍幽州刺史諡曰恭

子伊利高宗時襲爵除內行長以沉密小心恭勤不怠
領御食羽獵諸曹事伊利曾病顯祖幸其宅自視醫藥
其見待如此稍遷散騎常侍儀曹尚書出為安東將軍
兖州刺史善撫導在州數年邊民歸之五千餘戶高祖
時蠕蠕來寇詔伊利追擊之不及而反後依例降為侯
除司農卿光祿大夫卒世宗初贈征北將軍燕州刺史
諡曰靜

子阿奴亦忠實寡言有智度以勲臣之子除侍御中散
襲爵稍遷中散大夫卒

子殺鬼襲爵武泰中驃騎將軍南青州刺史

敦弟拔歷殿中尚書賜爵濟南公高祖時進爵為王除
征西將軍吏部尚書改封趙郡王後例降為公卒贈寧
東將軍定州刺史諡曰康陪葬金陵

子道生肆州安北府外兵參軍卒

子延天興中驃騎將軍左光祿大夫

結從子渥渥子提竝歷通顯提從世祖討赫連昌有功
賜昌女為妻

子雲早有名位顯祖時給事中西征勅勒為賊所襲殺
子蓋世宗時左將軍直閣將軍轉龍驤將軍濟州刺史
卒贈本將軍兗州刺史

長子鑒累遷冠軍將軍岐州刺史入除散騎常侍金紫
光祿大夫主衣都統卒贈侍中都督冀定瀛三州諸軍
事尚書右僕射司空公衛將軍冀州刺史以孝靜外戚

故也

鑒弟衡累遷天水樂陵二郡太守輔國將軍光州刺史
結宗人彌善射有膂力世祖時為軍將數從征伐有功
官至范陽太守卒贈幽州刺史

彌孫念字子懷武定中驃騎將軍膠州刺史

伊馘代人也少而勇健走及奔馬善射多力曳牛却行
神鹿初擢為侍郎轉三郎賜爵汾陽子加振威將軍世
祖之將討涼州也議者咸諫唯司徒崔浩勸世祖決行

羣臣出後馘言於世祖曰若涼州無水草何得為國議者不可用也宜從浩言世祖善之既剋涼州世祖大會於姑臧謂羣臣曰崔公智謀有餘吾亦不復奇之吾正奇馘弓馬之士而所見能與崔同此深自可奇顧謂浩曰馘智力如此終至公相浩曰何必讀書然後為學衛青霍去病亦不讀書而能大建勲名致位公輔世祖笑曰誠如公言馘性忠謹世祖愛之親待日殊賞賜優厚真君初世祖欲拜馘為尚書封郡公馘辭曰尚書務殷

公爵至重非臣年少愚近所宜荷任請收過恩世祖問其欲馘曰中祕二省多諸文士若恩矜不已請參其次世祖賢之遂拜為中護將軍祕書監以功賜爵魏安侯加冠軍將軍後出為東雍州刺史恩化大行百姓思之轉殿中尚書常典宿衛世祖親任之從幸瓜步頻有戰功進號鎮軍將軍興安二年遷征北大將軍都曹尚書加侍中進爵河南公興光元年拜司空及為三公清約自守為政舉大綱而已不為苛碎太安二年領太子太

保三年與司徒陸麗等竝平尚書事五年薨

子蘭襲散騎常侍庫部尚書卒

子盆生驍勇有膽氣初為統軍累有戰功遂為名將以
勲賜爵平城子神龜二年自驍騎將軍直閣將軍為持
節右將軍洛州刺史與荊州刺史淮南王世遵魯陽太
守崔模俱討襄陽不剋而還坐免官後除安西將軍光
祿大夫又為撫軍將軍太僕卿假鎮西將軍西道別將
每戰頻捷自崔延伯之後盆生為次焉進號征西將軍

行岐州刺史復為西道都督戰歿贈車騎將軍雍州刺史永熙中重贈驃騎大將軍儀同三司定州刺史

子武平司徒祭酒

武平弟武榮直閭將軍

黻族孫豹子武衛將軍

豹子從子琳亦武衛將軍

乙瓌代人也其先世統部落世祖時瓌父匹知慕國威化遣瓌入貢世祖因留之瓌使弓馬善射手格猛獸膺

力過人數從征伐甚見信待尚上谷公主世祖之女也
除鎮南將軍駙馬都尉賜爵西平公從駕南征除使持
節都督前鋒諸軍事每戰身先士卒勇冠三軍後除侍
中征東將軍儀同三司定州刺史進爵為西道都將和
平中薨時年二十九贈太尉公諡曰恭

子乾歸襲爵年十二為侍御中散及長身長八尺有氣
幹頗習書疏尤好兵法復尚恭宗女安樂公主除駙馬
都尉侍中顯祖初除征西將軍秦州刺史有惠政高祖

初即位為征西道都將又為中道都將延興五年卒時年三十一贈左光祿大夫開府儀同謚曰康

子海字懷仁少歷侍御中散散騎侍郎卒時年四十一贈散騎常侍衛將軍濟州刺史謚曰孝

子瑗字雅珍尚淮陽公主高祖之女也除駙馬都尉汝南王友固辭不拜歷濟南太守時為逆賊劉桃攻郡瑗踰城獲免後都督李叔仁討桃平之瑗乃還郡後除司農少卿銀青金紫左右光祿大夫中軍將軍西兗州刺

史天平元年舉兵應樊子鵠與行臺左丞宗顯戰敗死
時年四十六

瑗弟諧字遵和武定中司馬

諧弟琛字仲珍解褐司空參軍事稍遷東平濟陰二郡
太守散騎常侍卒時年四十九

和其奴代人也少有操行善射御初為三郎轉羽林中
郎以恭勤致稱賜爵東陽子除奮武將軍高祖初遷尚
書加散騎常侍進爵平昌公拜安南將軍遷尚書左僕

射太安元年詔羣臣議立皇太子名其奴與司徒麗等
以為宜以德命名帝從之又與河東王閭毗太宰常英
等竝平尚書事在官慎法不受私請時以西征吐谷渾
諸將淹停不進久囚未決其奴與尚書毛法仁等窮問
其狀連日具伏和平六年遷司空加侍中高宗崩乙渾
與林金閭擅殺尚書楊保年等殿中尚書元郁率殿中
宿衛士欲加兵於渾渾懼歸咎於金閭執金閭以付郁
時其奴以金閭罪惡未分乃出之為定州刺史皇興元

年長安鎮將東平王道符反詔其奴領征西大將軍率
殿中精甲萬騎以討之未至而道符敗軍還三年薨內
外咸歎惜之贈平昌王諡曰宣

子天受襲爵初為內行令太和六年遷弩庫曹下大夫
卒

苟頽代人也曾祖烏提登國初有勲於太祖賜吳寧子
父洛跋內行長頽性厚重少言嚴毅清直武力過人擢
為中散小心謹敬世祖南討以頽為前鋒都將每臨敵

對戰常先登陷陳世祖至江賜爵建德男加寧遠將軍
還遷奏事中散典涼州作曹遷內行令轉給事中遷司
衛監以本將軍拜洛州刺史為政剛嚴抑彊扶弱山蠻
畏威不敢為寇承明元年文明太后令百官舉才堪幹
事人足委此者於是公卿咸以顏應選徵拜散騎常侍
殿中尚書進爵成德侯加後將軍太和元年加散騎常
侍尋遷侍中安東將軍都曹尚書進爵河南公顏方正
好直言雖文明太后生殺不允顏亦言至懇切未曾阿

諛李訢李敷之誅也顏竝致諫太后不從三年遷征北
大將軍司空公進爵河東王以舊老聽乘步挽杖於朝
大駕行幸三川顏留守京師沙門法秀謀反顏率禁衛
收掩畢獲内外晏然駕還飲至文明太后曰當爾之日
卿若持疑不即收捕處分失所則事成不測矣今京畿
不擾宗社獲安者實卿之功也七年詔曰顏為台鼎論
道是寄歷奉四朝庸績彌遠宜加崇異以彰厥功自茲
已後可永受復除十三年冬薨高祖痛悼者久之贈賜

有加諡僖王

長子愷累遷冠軍將軍柔玄懷荒武川鎮大將襲爵河東王例降為公正光二年卒贈平北將軍恒州刺史子寶武定中北梁太守

愷弟養步兵校尉早卒

養弟資武騎侍郎河間太守太僕少卿汲郡太守遷龍驤將軍肆州刺史還除武衛將軍加後將軍延昌末卒贈平北將軍并州刺史并給帛二百匹布一百匹諡曰

愍

子景蠻莊帝時撫軍將軍金紫光祿大夫

顏弟若周散騎常侍尚書太和中安南將軍豫州刺史

顏川侯卒贈光祿大夫

若周弟壽樂太和中北部尚書安南將軍懷州刺史假

山陽公未拜尋除散騎常侍殿中尚書晉安侯卒贈安

東將軍冀州刺史

顏從叔孤少以忠直稱太宗即位以定策功拜車騎將

軍後除鎮軍大將軍并州刺史博陵公不治產業死之日家無餘財百姓追思之

薛野睹代人也父達頭自姚萇時率部落歸國太祖嘉其忠款賜爵聊城侯散員大夫待以上客之禮賜妻鄭氏達頭閑雅恭慎太祖深器之卒贈平南將軍冀州刺史諡曰悼野睹少失父母養於宗人利家及長好學善射高宗初召補羽林遷給事典民籍事校計戶口號為稱職賜爵順陽子野睹少孤父侯不襲至是錫爵和

平中除平南將軍并州刺史進爵河東公轉太州刺史
在治有聲卒年六十一贈散騎常侍大將軍并州刺史
諡曰簡

子虎子姿貌壯偉明斷有父風年十三入侍高宗太安
中遷內行長典奏諸曹事當官正直內外憚之及文明
太后臨朝出虎子為枋頭鎮將虎子素剛簡為近臣所
疾因小過黜為鎮門士及顯祖南巡次於山陽虎子拜
訴於路曰臣昔事先帝過霑重恩陛下在諒闇之日臣

橫罹非罪自擯黜此蕃已經多載不悟今日得奉聖顏
遂流涕嗚咽顯祖曰卿先帝舊臣久屈非所良用憮然
詔虎子侍行訪以政事數十里中占對不絕時山東饑
饉盜賊競起相州民孫誨等五百餘人稱虎子在鎮之
日土境清晏訴乞虎子仍復除枋頭鎮將即日之任至
鎮數州之地姦徒屏跡顯祖璽書慰喻後除平南將軍
相州刺史顯祖崩不行太和二年襲爵三年詔虎子督
三將出壽春與劉昶南討四年徐州民栢和等叛逆屯

於五固詔虎子為南征都副將與尉元等討平之以本將軍為彭城鎮將至鎮雅得民和除開府徐州刺史時州鎮戍兵資絹自隨不入公庫任其私用常苦飢寒虎子上表曰臣聞金湯之固非粟不守韓白之勇非糧不戰故自用兵以來莫不先積聚然後圖兼并者也今江左未賓鯨鯢待戮自不委粟彭城以彊豐沛將何以拓定江關掃一衡霍竊惟在鎮之兵不減數萬資糧之絹人十二匹即自隨身用度無準未及代下不免饑寒論

之於公無毫釐之潤語其利私則橫費不足非所謂納
民軌度公私相益也徐州左右水陸壤沃清汴通流足
盈激灌其中良田十萬餘頃若以兵絹市牛分減戍卒
計其牛數足得萬頭興力公田必當大獲粟稻一歲之
中且給官食半兵賴植餘兵尚衆且耕且守不妨捍邊
一年之收過於十倍之絹暫時之耕足充數載之食於
後兵資唯須內庫五稔之後穀帛俱溢匪直戍士有豐
飽之資於國有吞敵之勢昔杜預田宛葉以平吳充國

耕西零以彊漢臣雖識謝古人任當邊守庶竭塵露有
增山海高祖納之又上疏曰臣聞先王建不易之軌萬
代承之聖主垂不刊之制千載共仰伏惟陛下道洽羣
生恩齊造化仁德所覃迹超前哲遠崇古典留意治方
革前王之弊法申當今之宜用定貢賦之輕重均品秩
之厚薄庶令百辟足以代耕編戶享其餘畜巍乎煥焉
不可量也臣竊尋居邊之民蒙化日淺戎馬之所資計
素微小戶者一丁而已計其徵調之費終歲乃有七緡

去年徵責不備或有貨易田宅質妻賣子呻吟道路不可忍聞今淮南之人思慕聖化延頸企足十室而九恐聞賦重更懷進退非惟損皇風之盛慮傷慕義之心且臣所居與南連接民情去就實所諳知特宜寬省以招未至其小郡太守數戶而已一請止六尺絹歲不滿匹既委邊捍取其必死邀之士重何吝君輕今班制已行布之天下不宜忤冒以亂朝章但猥藉恩私備位蕃岳憂責之地敢不盡言書奏文明太皇太后令曰俸制已

行不可以小有不平便虧通式在州戍兵每歲交代虎
子必親自勞送喪者給其飲帛州內遭水二麥不收上
表請貸民粟民有車牛者求詣東亮給之竝如所奏民
得安堵高祖曾從容問祕書丞李彪曰卿頻使江南徐
州刺史政績何如彪曰綏邊布化甚得其和高祖曰朕
亦知之沛郡太守邵安下邳太守張攀咸以贓汚虎子
案之於法安等遣子弟上書誣虎子南通賊虜高祖曰
此其妄矣朕度虎子必不然也推案果虛乃下詔曰夫

君臣體合則功業可興上下猜懼則治道替矣沛郡太守邵安下邳太守張攀咸以貪恠獲罪各遣子弟詣闕告刺史虎子縱民通賊妄稱無端安宜賜死攀及子僧保鞭一百配敦煌安息他生鞭一百可集州官兵民等宣告行決塞彼輕狡之源開此陳力之效在州十一載太和十五年卒年五十一贈散騎常侍鎮南將軍相州刺史諡曰文有六子

長子世遵襲爵例降為侯景明中為秦州刺史稍遷左

將軍年四十二

長子忱字安民正光中襲爵稍遷鎮南將軍鉅鹿太守
定州儀同開府諮議參軍齊獻武王大行臺左丞中外
府司馬出為殷州驃騎府長史武定五年除鎮北將軍
北廣平太守為治暴虐曾因公事一家之內併殺數人
為民所訟將致之罪遇患卒於郡贈征西將軍西兗州
刺史

忱弟安顥武定末東豫州征西府長史

世遵弟曇慶少有度量永平中員外散騎常侍遷尚書郎年五十一卒

子衍字元孫輕財慕義熙平中為侍御史奉朝請永安中尚書駕部郎中行河陰縣事卒於正平太守贈征東將軍徐州刺史

曇慶弟曇寶初補散騎高祖詔曇寶採遺書於天下歷侍御中散直閤將軍太子步兵校尉世宗時遣使巡行四方以曇寶持節兼散騎常侍龍驤將軍南道大使曇

寶達豫州卒年二十九

曇寶弟曇尚有容貌性寬和初辟御史加奉朝請熙平二年除徐州穀陽戍主行南陽平郡事母憂去職正光中詔以陽平隣接蕭衍綏捍須人仰尚書舉才而遣左僕射蕭寶夤舉曇尚應選馳驛之郡孝昌初徐州刺史元法僧叛入蕭衍曇尚斬其使人送首於都督安樂王鑒鑒不能援遂為蕭衍將王希舛所陷拘曇尚送蕭衍行以禮遇之曇尚乞歸衍乃聽還肅宗復其本秩武泰

初朱榮擅彊并肆朝廷欲揣其情除曇尚員外常侍使於榮託以慰喻密以觀之建義初除司徒左長史兼吏部尚書授太原王朱榮官還賜爵永安侯尋除後將軍定州刺史朱榮之死授持節兼尚書北道行臺代魏蘭根後為鎮東將軍金紫光祿大夫太昌初加征東將軍行兖州事天平中除驃騎大將軍齊州刺史曇尚凡歷三州俱稱貪虐還除將作大匠卒於官年六十一贈都督瀛滄二州諸軍事本將軍儀同三司瀛州刺

史

卷四十四

子仲芬武定中齊文襄王中外府中兵參軍

曇尚弟珣字曇珍武定末儀同三司尚書右僕射

宇文福河南洛陽人其先南單于之遠屬世為擁部大人祖活撥仕慕容垂為唐郡內史遼東公太祖之平慕容寶活撥入國為第一客福少驍果有膂力太和初拜羽林郎將遷建節將軍賜爵新昌侯南征都將擊蕭蹟有功授顯武將軍尋除恢武將軍北征都將特賜戎服

破蠕蠕別部獲萬餘還除都牧給事十七年車駕南討
假冠軍將軍後軍將軍時仍遷洛勅福檢行牧馬之所
福規石濟以西河內以東拒黃河南北千里為牧地事
尋施行今之馬場是也及從代移雜畜於牧所福善於
將養竝無損耗高祖嘉之尋補司衛監從駕豫州加冠
軍將軍西道都將假節征虜將軍領精騎一千專殿駕
後未幾轉驍騎將軍仍領太僕典牧令從駕征南陽兼
武衛將軍二十二年車駕南討遣福與右衛將軍楊播

為前軍至鄧城福選兵簡將為攻圍之勢高祖望福軍
法齊整將士閑習大被褒歎蕭鸞遣其尚書崔慧景黃
門郎蕭衍率衆十萬來救高祖指麾將士勅福領高車
羽林五百騎出賊南面奪其橋道遏絕歸路賊衆大恐
六道來戰福據鞍誓衆身先士卒賊不得前遂大奔潰
賜爵昌黎伯正武衛加征虜將軍尋以高車叛命加征
北將軍北征都將追討之軍敗被黜景明初乃起拜平
遠將軍南征統軍進討於都督彭城王勰曰建安是淮

南重鎮彼此要衝得之則義陽易圖不獲則壽春難保
颺然之及颺為州遂令福攻建安建安降以勲封襄樂
縣開國男邑二百戶除太僕少卿尋以衍將寇邊假節
征虜將軍領兵出三關討之又詔福行豫州事與東豫
州刺史田益宗共相影援綏遏蠻楚還為光祿大夫轉
太僕卿延昌中以本官領左衛將軍除散騎常侍都官
尚書加安東將軍營州大中正熙平初除鎮北將軍瀛
州刺史福性忠清在公嚴毅以信御民甚得聲譽解任

復除太僕卿又為金紫光祿大夫出除散騎常侍都督
懷朔沃野武川三鎮諸軍事征北將軍懷朔鎮將至鎮
遇病卒詔遣主書樂安嘉赴弔贈車騎大將軍定州刺
史開國如故謚曰貞惠

長子善字慶孫襲爵自司空掾稍遷平南將軍光祿大
夫孝昌末北征戰歿贈車騎將軍冀州刺史

善弟延字慶壽體貌魁岸眉目疎朗永平中釋褐奉朝
請直後員外散騎常侍以父老詔聽隨侍在瀛州屬大

乘妖黨突入州城延率奴客戰死者數人身被重瘡賊乃小退而縱火燒齋閣福時在內延突火而入抱福出外支體灼爛髮盡為燼於是勒衆與賊苦戰賊乃散走以此見稱孝昌中授假節建威將軍西道別將赴援關隴有戰功除員外散騎常侍轉直寢與万俟醜奴戰沒贈冠軍將軍豫州刺史

子仲鸞武定末齊王丞相府長流參軍

慶壽弟慶安歷給事中尚書殿中郎中後加平北將軍

武衛將軍河陰遇害贈征東將軍兗州刺史

長子仲融

融弟仲衍

費于代人也祖峻仕赫連昌為寧東將軍泰常末率眾
來降拜龍驤將軍賜爵犍為公後遷征南將軍廣阿鎮
大將徙爵下邳公父郁以隨父歸誠勲賜五等男除燕
郡太守卒贈幽州刺史于少有節操起家內三郎世祖
南伐從駕至江以宿衛之勤除寧遠將軍賜爵松陽男

遷商賈部二曹令除平南將軍懷州刺史卒

子萬襲太和初除平南將軍梁國鎮將後高祖南伐萬從駕渡淮戰歿贈鎮東將軍冀州刺史

子穆字朗興性剛烈有壯氣頗涉書史好尚功名世宗初襲男爵後除夏州別駕尋加寧遠將軍轉涇州平西府長史時刺史皇甫集靈太后之元舅恃外戚之親多為非法穆正色匡諫集亦憚之轉安定太守仍為長史還朝拜左軍將軍轉河陰令有嚴明之稱時蠕蠕主婆

羅門自涼州歸降其部衆因饑侵掠邊邑詔穆銜命宣
慰便皆款附明年復叛入寇涼州除穆輔國將軍假征
虜將軍兼尚書左丞西北道行臺仍為別將往討之穆
至涼州蠕蠕遁走穆謂其所部曰彼衆輕狡唯利是視
見敵便走乘虛復出今王師來討雖畏威逃跡然軍還
之後必來侵暴今欲羸師誘致冀獲一戰若不令其破
膽終恐疲於奔命衆咸然之穆乃簡練精騎伏於山谷
使羸劣之衆為外營以誘之賊騎覘見謂為信弱俄而

競至穆伏兵奔擊大破之斬其帥郁厥烏爾俟斤十代等獲生口雜畜甚衆及六鎮反叛詔穆為別將隸都督李崇北伐都督崔暹失利崇將班師會諸將議曰朔州是白道之衝賊之咽喉若此處不全則并肆危矣今欲選諸將一人留以鎮捍不知誰堪此任僉曰無過穆者崇乃請為朔州刺史仍本將軍尋改除雲州刺史穆招離聚散頗得人心時北境州鎮悉皆淪沒唯穆獨據一城四面抗拒久之援軍不至兼行路阻塞糧仗俱盡穆

知勢窮乃棄城南走投余朱榮於秀容既而詣闕請罪
詔原之孝昌中二絳蜀反以穆為都督討平之拜前將
軍散騎常侍遷平南將軍光祿大夫妖賊李洪於陽城
起逆連結蠻左詔穆兼武衛將軍率衆討擊破於關口
之南遷金紫光祿大夫正武衛將軍余朱榮向洛靈太
后徵穆令屯小平及榮推奉莊帝河梁不守穆遂棄衆
先降穆素為榮所知見之甚悅穆潛說榮曰公士馬不
出萬人今長驅向洛前無橫陳者正以推奉主上順民

心故耳既無戰勝之威群情素不厭伏今以京師之衆
百官之盛一知公之虛實必有輕侮之心若不大行誅
罰更樹親黨公還北之日恐不得度太行而內難作矣
榮心然之於是遂有河陰之事天下聞之莫不切齒榮
入洛穆遷中軍將軍吏部尚書魯縣開國侯食邑八百
戶又領夏州大中正蕭衍遣將軍曹義宗逼荊州詔穆
為使持節南征將軍都督南征諸軍事大都督以援之
穆潛軍徑進出其不意至即大破之生擒義宗送闕以

功遷衛將軍進封趙平郡開國公增邑一千戶遷使持節加侍中車騎將軍假儀同三司前鋒大都督與大將軍元天穆東討邢杲破平之時元顥內逼莊帝北幸顥入京師穆與天穆既平齊地回帥將擊顥穆先驅圍虎牢盡銳攻之將拔屬天穆北渡既無後繼人情離沮穆遂降顥以河陰酷濫事起於穆引人詰讓出而殺之年五十三莊帝還宮追贈侍中司徒公諡曰武宣長子慶遠永安中龍驤將軍青州開府司馬

第二子孝遠襲天平中叛入關西

孟威字能重河南洛陽人頗有氣尚尤曉北土風俗歷東宮齊帥羽林監時四鎮高車叛投蠕蠕高祖詔威曉喻禍福追還逃散分配為民後以明解北人之語勅在著作以備推訪永平中自鎮遠將軍前軍將軍左右直長加龍驤將軍出使高昌還遷城門校尉直閭將軍沃野鎮將正光初蠕蠕主阿那瓌歸國詔遣前郢州刺史陸希道兼侍中為使主以威兼散騎常侍為副遠畿迎

接阿那瓌之還國也復以威為平北將軍光祿大夫假員外常侍為使主護送之前後頻使遠蕃粗皆稱旨復加撫軍將軍普泰中除大鴻臚卿尋加驃騎大將軍左光祿大夫天平三年卒贈使持節侍中本將軍都督冀瀛滄三州諸軍事司空公冀州刺史子恂嗣

威弟季稍遷鎮遠將軍左中郎將廷尉監以本將軍除廣州刺史預介朱榮義舉封鉅鹿縣開國公食邑一千戶除撫軍將軍廷尉卿轉司農卿出為平西將軍華州

刺史卒贈車騎大將軍雍州刺史

史臣曰羅結枝附葉從當舊之眷子孫顯祿俱至公王
伊馭以勇力見擢而能贊伐姑臧之策請參中祕之官
世祖嘉之於前良有以也乙瓌之驍猛和奴之貞正苟
顏之剛直虎子之威彊宇文之氣幹咸亦有用之士費
穆出身致力遂有功名而末路一言禍被簪帶校之文
和異世同咎其死也幸哉孟威致力荒裔其勤可錄矣

羅結孫拔高祖時進爵濟南王拔孫延天興中驃騎

將軍案太祖初卽位年號天興拔仕高祖其孫必非
太祖時蓋年號誤也

魏書卷四十四

魏書卷四十四考證

羅結傳子延天興中驃騎將軍左光祿大夫○

臣人龍

按道武紀天興為太祖年號今延之祖拔於高祖時
進爵為王已距天興七八十年矣安有其孫先於爾
時為驃騎將軍光祿大夫者耶年號當有訛

費于傳引人詰讓○人北史作入

魏書卷四十四考證